



04913

平浙紀略卷九

同治元年六月十六日奉



書目
書目
書目

天
天
天

命督辦軍務浙江巡撫左公疏言定海解圍後克復鎮海甯
波慈谿奉化郡縣等城均經前江蘇撫臣薛煥及署撫
臣李鴻章先後奏報台州民團克復全境經督臣慶端
奏報甯台各郡皆遠在海隅臣軍由關遂江常而至衢
州相距千餘里賊氛中隔得報稍遲據各路文報證以
所聞略悉梗概台郡地瘠民強上年賊首李世賢竄陷
後分遣賊黨散踞各縣爲縱橫海上之計旋以官軍入
浙急思抗拒乃由台州還竄金華賊目李鴻釗李元徠

平浙紀略

卷九

一

李尙揚等在台大肆淫掠士民不堪其毒於是倡義討
賊各相糾率出不意擊之旬日之間連復郡邑斃賊五
六萬賊目皆就禽斬臣獲棧天義羅賊致李世賢僞文
言台事甚詳其畏仙居士民尤甚論台黃出力士紳以
在籍道員蘇鏡蓉爲最仙居出力士紳以副貢生吳琮
爲最而吳琮因其父被害殺賊報仇英烈之風尤足矜
式鄉里定海解圍後克復鎮海厥後會合外國兵船克
復甯波多資布輿有布良帶等之力布輿有在洋橫行
有年熟習海上形勢前任浙江臬司段光清撫而用之
以護商旅司巡緝加意羈縻始就約束此次陳世章張

景渠用之亦克有功甯波旣克敗賊遁入紹興台州旣克敗賊萃於處郡溫郡之賊畏台州士民之議其後則由處郡以回竄金華就現在局勢言之襄賊中央絕其分竄似亦浙事一大轉機而臣愚竊不能無慮也台州之克全藉民團甯波之克半資外國而官軍曾無一旅與之周旋外國助勦但可偶用其長未可長恃其助卽台郡士民一時偕作同仇無良將吏爲之主持終慮情渙氣衰難以持久臣現檄代理台州知府崑齡於赴任之後詳察各處情形及實在出力士民分別安撫獎勵諭蘇鏡蓉吳琮等互相聯絡以收衆志成城之效令署

甯紹台道史致諤先由安慶雇坐輪船駛赴上海由定海鎮海以抵甯波並經理稅釐事務熟審其能養兵若干隨時馳稟以便核酌一面札調前臬司段光清紳士陳政鎬令隨同經理以資得力俟臣所調兵勇到齊餉項有出再當斟酌辦理如處州已復則分撥一軍由處台陸路直達甯波可無中梗之患至英國公使稱調印度之兵秋間大舉助勦或係懸擬之詞不必實有其事聞英國兵餉最重亦頗以調撥之煩爲苦非公使等所能專擅印度兵船距中國五六萬里亦非一時所能驟集又諸暨縣民包立生聚衆殺賊頗著戰功然傳聞異

詞未敢遽信其真可倚任後印度兵船果不至而包立
生據包村阻水爲塹賊屢來攻皆破之殺傷甚衆鄰境
被難士民挈家從之者數萬人每戰勝掠賊金帛至於
山積以分犒力戰者人皆不暇取徒受之而已疊次殺
賊及團練戰死物故者各十餘萬賊憤怒大合衆晝夜
力攻卒陷其村殲其人鮮得脫者悉如左公言八月二
十日又奏張景渠稟報克復餘姚縣城溫台處之賊盡
聚金華一郡九月初九日又奏甯紹台道史致諤於八
月二十五日到任據稟慈溪失而復克賊又陷奉化甯
波戒嚴臣維甯波一郡遠在海滋中隔賊氛雖藉外國

兵力暫保孤城主弱客強終非久長之計而彼中兵事
冗雜每月糜餉至八萬餘兩入不敷出又值廣勇與外
國兵頭構釁誠恐外侮內訌相乘而起臣原擬酌派新
軍取道溫台防守甯波茲聞僞忠王李秀成及各大股
賊黨分撲金陵大營兼及皖南意在竄入江西以緩浙
軍之攻而抄襲浙軍之後臣隨時調撥兵力苦單勢難
分赴甯波護理浙江提督陳世章失守獲咎新授提臣
鮑超統軍皖南未能赴任前經慶端奏委葉炳忠護理
臣已咨商耆齡催令迅赴甯波以重職守繼思葉炳忠
卽由台郡前往部曲無多恐難得力現在溫台處三郡

漸就肅清雖有零賊竄擾邊界並非喫重記名提督秦如虎本係宿將所部在閩粵各軍中尚稱能戰近因攻處城受微傷回溫調治而所部現赴台州由台赴甯路甚捷近若蒙

恩旨令其署理浙江提督迅率所部由奉化而至甯波以視葉炳忠聲勢較壯甯郡必可無虞矣十月二十二日又奏臣奉

寄諭法國因甯波海口喫緊願將伊國副將勒伯勒東權受中國職任帶兵防勦現由總理各國事務衙門與之定議該國情願以勒伯勒東權受中國職任聽浙江巡撫

平浙紀略

卷九

四

及甯波道節制著將該副將在甯波所練中國兵丁一千五百名應給餉項卽行按照舊章支放並據恭親王等奏稱以該副將旣歸浙省大員節制卽應給付劄憑以一事權著薛煥李鴻章左宗棠悉心籌議或由李鴻章或由左宗棠發給劄付旣須事權歸一又須力能控制方免貽悞該副將旣受中國職任之後自應遇事持平辦理一切按照中國法制不得稍存偏倚亦不得稍有寬縱史致諤甫到甯郡薛煥等務卽督飭該道於該副將所領之軍及甯郡兵勇賞功罰罪及稟報戰守各情務令秉公核實其支放錢糧尤不得有絲毫扣減浮

言等獎致爲外國所輕視至籌防一節先經法國公使欲統歸勒伯勒東辦理復經總理衙門與之再三講論始願歸甯道督辦惟上年甯郡失事美國人歸咎中國官不肯照伊布置辦理以致誤事此次該副將有所籌商務飭該道與之和衷共濟不得意存齟齬致誤機宜一俟左宗棠等克復金華兵力足以兼顧甯波一帶卽日察看情形將勒伯勒東撤回法國仍用中國官軍防守毋庸俟浙省全行平靖方令撤卸等因臣初以甯波距上海近距臣軍遠中隔賊氛暫難兼顧且李鴻章威名丕著中外咸知臣於甯波兵事旣合史致謬就近稟

承則勒伯勒東劄憑亦應由李鴻章發給以資控制繼思法國請以勒伯勒東權受中國職任聽撫道節度原係就轄境而言異時更易撤留仍須由浙主持自宜先正其名已繕備勒伯勒東署理浙江總兵劄憑由安慶輪船遞史致謬轉發並咨薛煥李鴻章知照矣臣維人無中外其好惡同則其情理一忠信篤敬蠻貊可行內治克脩遠人自服如賞功罰罪不秉大公諱敗攘勝不務核實以及冒餉侵尅皆主兵者所最忌有一於此部曲離心況施之荒遠內附之人乎史致謬人尚明白當不至於此臣亦隨時誠勵期免愆尤惟是沿海各郡自

五口既開之後人心嗜利忘義習尚日非又自上海用兵以來至今未覩戰勝之利於是妄自菲薄爭附洋人其黠者且以通洋語悉洋情猝至富貴趨利如鶩舉國若狂自洋將教練華兵桀驁者多每挾洋人之勢橫行鄉里官司莫敢詰治近聞甯波提標兵稍健壯者圖得厚餉且多棄伍籍而投洋將此常勝一軍所以增至四千五百人也若不稍加裁禁予以限制則客日強主日弱費中土至艱之餉而貽海疆積弱之憂人心風俗日就頹靡終恐非計臣擬熟察情形俟局勢稍有轉機再與曾國藩李鴻章熟商安策是爲洋將受職任稟節度

之始昔回紇助唐契丹救晉皆率其突騎馳驟中原雖紆一時之危或貽數世之禍泰西各國始因寧波馬頭人自爲戰有安危與共之心迨後遂能效順以彼兵法練我士卒並受疆吏節制

廟算之略旣出萬全而左公疏中數言復扼其要用能中外相安始終合力有昔人之利而無昔人之害雖曰時異勢殊非處置之善不及此十一月二十三日又奏中外各軍會克上虞後新昌嵎縣之賊皆竄諸暨二年二月初四日又奏我軍旣克浦江諸暨擊走東陽永康竄賊蔣益澧方令劉清亮率五營繼進規取紹興適接高連

陞稟報紹興府城已於正月二十六日經署提督葉炳忠等督甯波諸軍收復賊由臨浦義橋渡江而遁蓋至是甯台紹各郡俱次第恢復矣甯紹夙稱浙東饒沃繁富與嘉湖埒台亦負山阻海同隸一道自上年賊陷金華由紹台以及於甯郡縣并失惟定海一城孤懸海外得全先是甯紹台道張景渠與護提督陳世章等固守甯波賊從奉化攻陷郡城景渠受矛傷世章墜馬受傷均爲礮船所救法國提督卜刺以船送定海是時賊氛徧海隅勢若燎原景渠旣至定海謀恢復會游擊布興有及弟良帶先後以礮船至并收潰勇七百人景渠爲

流涕言浙事皆大哭令署定海同知劉國觀等捐爲餉畱之時時激以忠義士心益奮同治元年二月二十四日賊船至舟山直犯定海國觀等登陴守景渠世章督布興有等迎擊斃賊甚衆賊少卻已而民團四集賊遂大潰追殲之海中生還者十無二三焉而台郡民團起於十一年在籍道員蘇鏡蓉邀集參將陶寶登都司銜黃漣清知州徐灝副貢生吳琮廩生王瀚等共二十五人各相激勸義旗雲合鏡蓉寶登皆豪俠士好袒庇邑中諸無賴以爲爪牙及甯國設防寶登帶勇前往戢守數年頗習賊情亦漸知大義旣歸里與鏡蓉相倚以爲

重台州故多土匪應募爲勇者亦往往不請紀律追鏡
蓉等有志殺賊此輩皆歸之獷悍之風化爲剛健不煩
官軍一士一卒而以次收復諸城竟得其力焉吳琮者
仙居人因其父被賊所辱誓殺賊以報仇先遣人積石
堵山路拒金華紹興之賊援更遣鄉人賫賂入城覘其
虛實至賊之由新昌入天台也天台士民之黠者餉賊
於要津每賊貽餅二賊喜甚而不知借餅以計其多寡
也至是吳琮倡義天台首應之府城亦應之而鏡蓉寶
登等先已克復黃巖太平兩城殲賊殆盡嗣因大股賊
掩至復失寶登突圍得免退駐黃巖之三江口召集礮

船扼賊南竄之路賊出僞示招之元年二月十四日寶
登率敢死士四百詐投入城李世賢陽爲優待分散其
衆僅畱親兵十餘派賊日夜守視不得發十九日夜密
約三江口礮船遙爲援應城內火起寶登手刃數賊越
城而出從之者僅數十人餘皆被害賊追至三江口礮
船擊敗之斬十餘賊禽二賊賊繇此疑懼退入台州城
而天台自上年陷後賊見鄉團已集潛糾東陽新昌賊
黨三萬餘來助十一月初四日民團會合迎勦鏖戰竟
日斃賊七八千餘衆潰散復追殺千餘民團亦陣亡二
十六人次日景天義秦賊等率大股賊衆復從東陽來

援與新昌援賊兩路夾攻民團因眾寡不敵陣亡千餘
人心憤怒各鄉並起與賊連戰五晝夜禽斬甚多並殲
騎馬賊二百餘盡獲其馬騾賊敗退追殺數十里直至
東陽境始回元年正月初八日民團會集十餘萬行抵
橋上莊賊開礮拒敵民團分隊繞至東門賊營後擲火
包焚壘大戰五時之久賊大敗乘勝殺入城內賊猶抵
死巷戰天台汛把總宋慶彪帶兵繼至民團愈奮陣斃
偽酋李余二賊生禽一百三十四斬馘無數賊奪路逃
走復被截殺二百餘奪獲偽印二顆卽於是日克復天
台先是天台賊被圍出戰又挫自知不免乃皆反縛如

被擄人狀冀民團誤以爲難民而釋之也迨城破引頸
受戮無一能脫者蘇鏡蓉等旋與署仙居知縣費希濂
太平知縣吳奎祥等訂期同時進剿三月二十八日吳
琮王瀚等率民團數萬圍攻田市賊卡殺賊四百餘二
十九日進攻仙居縣城賊出戰擊斃數百退入拒守民
團直逼城下四月初三日設伏誘賊出城掩殺數千禽
獲賊首延天義李元祿臬示遂克復仙居城而教諭周
炳勳等亦於三月三十日糾合義眾先攻皤鎮踞賊圍
殺三千餘四月初一日進逼太平縣城晝夜環攻初三
日辰刻由南門蟻附而登殺賊七千餘賊由東西兩門

逃竄遂克太平初三至初九日鏡蓉等約會前黃巖鎮
總兵張清標前黃巖知縣李汝紹臨海知縣鄭煜等進
逼台州分道環攻寶登令礮船駛攻南門一帶天台知
縣王興杞等率團助戰聲勢大震賊數出戰皆敗之初
九日併力殺入城中斬其僞酋李遇茂李紅保賊伏尸
滿地遂復台州初十日乘勝直搗黃巖分路截殺斃賊
無數斬其僞主將李賊卽將縣城克復十五日鏡蓉等
派團約會參將蘇方拱及甯海教諭高錫蕃聯合鄉團
進攻縣城賊拒敵團衆奮擊賊紛紛驚惶逃竄民團乘
之復斃多賊甯海亦復台州全境肅清初賊由金華入

台實數萬人至是回金者無幾其敗匪多從甯海竄入
甯波或翻山入溫處蓋以金台之歸路已絕云其張景
渠陳世章定海之師及布輿右布良帶前署甯波知府
林鈞署鎮海知縣吳寶仁等於四月初七日率眾揚帆
直指鎮海先一日聞省商船連檣過境乘夜製旂數十
面使懸竿首爲疑兵並密邀洋廣艇船勇敢者三百人
助戰又募人釘塞招寶山賊礮火門師船駛近關口賊
開礮迎拒我軍酣戰數時擊沈賊船五十餘艘乘勝駛
入關內薄暮抵城擊斃賊數百生禽十六燒賊船二十
餘并燬城外賊卡賊背城力拒我軍受傷頗多益爭先

殺賊賊乃卻初八日分門環攻南門軍薄城而上被賊鎗斃一人受傷十餘賊復開門出戰我軍追至道頭東門兵勇分隊回擊互有傷亡時民團不期而至者數萬人先將四鄉賊卡踏平斃賊二千餘禽戮二百餘士氣百倍賊旌旗蔽野我軍悉隊擊之斃黃衣賊目十餘奪獲黃旂三百餘面賊鼠竄回城夜半我軍冒雨進攻緣城齊上賊懼而遁初九日寅刻復鎮海卽於是日整隊乘潮進駛甯波當鎮海戰急英國總兵哇樂德克乘輪船由甯來觀謂賊衆我寡殆不可勝及是舟次白沙外國兵頭皆賀揚揚有喜色賊方欲得北岸地外國人勿

許相持不下甯郡紳士中書陳政鑰等因而間之密約兵頭助勦僉謂必賊礮及其船乃可我師旣至民團十餘萬勢如飈集初十日賊由東渡門出隊我軍迎勦民團在浮橋一帶夾擊斃賊甚衆十一日兵團並進監生鄭維春以練勇五百人從之賊憑橋固守攻之勿克十二日黎明維春等率團勇進攻和義門布輿有率礮艇乘潮駛近東渡門游擊李光先然礮擊賊賊開礮拒敵子落英法二國兵船遂助我軍轟擊賊亦悉力相持布良帶揮兵團由江東陸路馳赴靈橋門衝過江橋殺賊數百舟師往來奮擊盡毀賊卡數十自辰至申礮震數

千聲外國火器猛烈轟坍城垣十餘處斃賊無算洋兵先登鄭維春等揮隊從之賊嬰城死拒鎗礮如雨陣亡英國一參將水師二人受傷十七人受傷法國一副將水師十一人陣亡二人我軍亦陣亡百餘遂由和義門畢登克復郡城賊向西北兩門分竄自相踐踏復經我軍追殺死者不計其數奪獲偽印五十餘顆旂幟鎗礮器械無算當是時各屬民團並起數日之間燹流響應陳世章張景渠派守備羅熊縣丞查廷楨帶兵會剿比至慈谿民團已圍攻縣城十三日賊遁被鄉團兜剿無路逃走十四日回竄慈谿英法兩國輪船駛往太平橋

一帶轟擊賊創而奔輪船駛回甯港賊乘間仍竄回城輪船再往轟擊張景渠等復令兵團由陸路勦洗於十五日收復慈谿奉化知縣屈永清都司魏杰卿等因民團於十四日克復奉化殺賊二千餘象山知縣嚴家丞紳士李椿等密令陷賊之柯有解散脅從一面集團請兵張景渠等派兵馳往助勦賊驚潰十五日收復象山於是甯境咸復二十三日景渠等率師規取餘姚賊置守甚固乃遣人赴上海添募壯勇並邀外國兵船及副將華爾所部常勝軍前來會勦新昌紳士孫善松等亦募勇來助七月初三日水陸俱發餘姚新舊兩城隔水

屹立賊於水隘密排木椿兩岸築卡列大礮以拒我師
景渠乘船先進初五日行抵岳廟江外賊開礮抵拒初
六日中外各軍分由南北岸並擊斃賊甚多是夜景渠
親督勇士入水拔椿兩岸彈落如雨景渠不爲動須臾
盡拔江路無阻兵船礮艇駛近城垣轟擊陸路兵團復
從山背環攻賊勢不支先克新城乘勝追殺舊城亦克
賊由上虞嵯縣一路竄去八月中旬景渠謀畫守曹娥
江然後整兵西向會甯紹台道史致諤莅任十二日上
虞嵯縣大股賊撲餘姚爲我軍擊退十八日賊衆萬餘
復四面來攻前護理提督陳世章等督各軍與英法兩

平浙紀略

卷九

三

國兵船合力奮擊四時之久賊始敗退十餘里員外郎
謝敬率團截殺亦有斬獲賊遂分而爲三一屯餘姚境
內牽制我師一繞僻徑犯慈谿衆各數千一犯奉化陳
公嶺衆二萬餘其犯慈谿之賊於二十五日突至小北
門分攻東西兩門慈谿知縣孫紹芬等登陴守禦賊攻
破西門縣丞薛世奎力戰陣亡城遂陷史致諤亟令中
外軍船進剿陳世章亦令同知銜謝采璋率所部忠義
軍並與稅務司日意格籌派法國兵勇馳往策應復令
各軍扼守餘姚四門鎮而自率小隊折回甯郡守禦二

十六日英國總兵哇樂德克及副將華爾參將馬惇行

抵慈谿會合忠義軍與紳士邵箴等民團方欲進攻時
有別股賊竄至半浦大西壩一帶距城二十餘里中外
軍卽駐半浦截其來路二十七日華爾督隊前進指揮
兵頭六人率衆攻城城上烏鎗洞中華爾之胸救護回
船而常勝軍已冒煙登城遂克之賊潰亂由北門奪路
走各軍截殺數百生禽數十奪獲馬匹旂幟甚多二十
八日華爾殞於甯郡其犯奉化陳公嶺之賊二十六日
都司邵英豪等迎戰而敗二十七日賊踰嶺由谿口直
撲縣城署奉化知縣屈永清督衆守禦二十八日東南
兩門破永清死之賊分屯南北渡距甯郡四十里英法

兵船駛截江口並將北渡之賊擊退閏八月初一日賊
從北渡小路竄至櫟社距郡城十五里史致諤等率兵
團及外國軍咸登陣守日午賊進攻西南兩門城上鎗
礮環開炸彈迸裂賊多死傷水師輪船釣艇復從東南
門外江面截擊轟斃騎馬二賊及其衆數十賊敗回櫟
社初二日退踞姜山橫溪石橋夾村等處史致諤陳世
章合游擊布興有等廣濟勇游擊吳長安詔安勇都司
楊應龍忠勇廩生李諤大嵐勇陳朝雲等義勇增生童
會等鄞縣各鄉團與提標所部約會英國總兵呿樂德
克繙繹官有雅芝美國帶兵官法爾師德法國參將德

克碑稅務司日意格等水陸各軍及我師船於十五日同時拔隊進剿偵知方橋南渡之賊退入奉化縣城姜山夾村之賊併聚橫溪石橋十六日中外各軍直薄城下唾樂德克等攻東北兩門楊應龍李諤等攻西門民團圍南門自辰至酉環攻竟日賊嬰城死拒鎗礮稠密繼以火罐美國陣亡兵頭那師及兵勇十一受傷二十餘我軍陣亡十一受傷三十餘戍刻收隊十七日黎明復整隊攻城橫溪石橋之賊自東北蜂擁來援唾樂德克法爾師德等令俟賊逼近連放炸彈大礮轟斃騎馬賊十餘賊黨千餘救出被擄難民二千餘賊敗退陳世

章等邀而擊之生禽七十餘其逃匿山林者均被民團收斬無遺我軍復四面圍攻賊猶力拒楊應龍乘夜由西北隅梯城而上所部從之斬開北門關中外軍咸入殺賊二百餘生禽六十餘獲旂械無算拔出難民八百餘賊由南門奪路向夏毛嶺一帶竄去追逐十餘里又斃多賊於十八日寅刻克城自奉化復陷台屬甯海天台仙居等縣俱逼近賊氛聞八月初五日東陽岷之賊竄至新昌之汝畧距天台境二十餘里知縣王興杞令小西鄉民團扼要堵禦與署台州同知韓承恩督帶城中團練迎剿初六日賊來犯境城鄉團併擊頗有斬獲

逐北十餘里初七日賊繞由新昌之清壇等處欲犯天
台北鄉王興杞等復率團往禦初十日大股賊竄至小
張薰坑等處勢甚猖獗亟調各鄉民團策應十一日賊
來衝撲營盤各團合力抵禦鏖戰三時殺賊四十餘及
騎馬賊四後面賊衆來援王興杞分隊抄擊賊披靡而
走追殺十餘里平其五壘奪獲烏鎗旂幟四十餘民團
亦陣亡三人受傷十八人總督耆公疏言賊復陷慈谿
奉化並由奉化攻撲甯波府城甯郡克復未久人情危
懼經中外各軍戮力同心殺賊千餘將兩城次第攻拔
餘賊遠遁地方復安厥功甚鉅此時甯屬肅清自應乘

勝進取上虞嵯以勦爲防杜賊回竄護浙江提督葉炳
忠已由台州起程赴甯臣催令兼程前往與史致諤等
激勵士卒聯絡外國妥籌防勦事宜惟賊不得志於甯
波難保不窺伺台郡雖天台仙居等縣民團踴躍同仇
屢挫賊鋒仍賴官兵接應以壯聲威前派游擊甯世杰
等所帶楚勇一千尙駐甯海溫處道支方廉與記名提
督秦如虎續派心誠勇五百前往協防有此兩軍足爲
各縣策應游兵臣檄令署台州知府峴齡率屬獎勵民
團嚴密防守確探賊蹤所向酌撥兵勇合力迎擊以固
疆圉英國副將華爾自在松江訓練常勝軍以來臨陣

奮勇屢著戰功茲因攻慈谿中鎗身殞深堪憫惻請與陣亡之縣丞薛世奎分別卹恤照例議卹奉化殉難知縣屈永清亦請優卹其陣亡美國兵頭那師並令道府妥爲照料外國傷亡兵勇另核辦理史致謬旣代張景渠仍以兵事屬之會慈奉兩邑失而旋復餘姚四門鎮又陷員外郎謝敬爲賊所得不屈賊久乃害之景渠曰賊之敢鴟張者恃有嵎可負也巢穴若傾餘氛自熄遂與前護提督陳世章法國副將勒伯勒東部署中外各軍於九月二十七日直搗上虞賊沿途結卡樹柵一十四處悉奪燬之殲賊無算拔出難民數千三十日進薄

縣城以炸彈大礮轟之賊猶力拒稅務司日意格督隊直前臂中賊鎗各軍奮登斃賊千餘賊渡曹娥江遁去十月初一日收復上虞城新昌密邇天台前自天台旣克宋慶彪等卽於二十二日督團馳赴新昌助剿賊由南門出拒酣鬪三時斃賊數十民團亦陣亡十六人三月初七日約會新昌民團攻城鎗斃城上守賊百餘二十四日復往圍攻城賊三四萬悉出迎戰相持兩晝夜斃賊不計其數內有黃衣賊目八騎馬賊數十至二十六日賊始退入城追抵城下適嵎縣賊衆兩路來援各圍回剿失利陣亡一百四十餘僅斃賊數十旋因糧盡

引還天台會台甯俱平新昌之賊聞風震恐於四月十八日竄至嵯縣交界之黃宅鎮焚掠俄而兩郡敗賊竄入新昌二十五日王興杞等率民團三萬餘復與新昌民團合攻縣城轟破東門一鼓克之禽斬六賊酋二十六月整隊馳攻黃宅斃賊數百生禽十三餘賊竄向嵯縣而去嗣後新昌復爲賊踞十月初三日謀從煙山會墅嶺兩路夾攻天台時署天台知縣劉焯方與署台州同知韓承恩前杭州水師協副將王邦慶等率團進攻東陽聞警馳往分路扼守並調城鄉各團策應初四日賊蜂擁來撲會墅嶺劉焯出卡督隊迎擊斃賊數十賊

平浙紀略

卷九

支

敗奔適王邦慶亦由煙山擊敗賊衆合力逐北復斬十二級追抵斑竹駐紮偵知敗賊盡聚新昌城中約會新昌各鄉團於初五日寅刻齊集攻城賊矢石如雨各團力攻兩時斃賊數十遂緣山脚梯城而登連斬執旂數驍賊王邦慶亦攻破東門兩路奮呼殺入賊勢不支由西北兩門分竄嵯諸暨沿途復被鄉團截殺多賊拔出難民百餘民團亦陣亡三十餘人受傷五十餘人劉焯復約會署嵯縣知縣史致遜及團紳貢生庾德馨等乘勝攻嵯於初七八日合勢偏之賊懼而遁於是再克新昌協復嵯縣皆天台民團之力也耆公疏請獎敘並言

數城皆克我軍距紹興郡城不遠臣飛檄史致諤激勵
中外各軍扼守曹娥江杜賊回竄一面相機規取紹郡
十一月下旬張景渠等屯駐百官遂督各軍進薄紹城
法國副將權受總兵職任勒伯勒東以上虞賊所遺土
礮往景渠止之請取到甯波輪船洋礮再進不聽果因
礮炸傷歿軍爲小挫乃以法國參將權受副將職任達
耳地福一名買忒勒接統其衆十二月二十四日英國
總兵哇樂德克親運大礮到營會商進兵景渠議分攻
稽山五雲安昌三門達耳地福哇樂德克議攻西郭門
景渠恐有疏失令各軍分路接應二年正月初一日達

平浙紀略

卷九

九

耳地福哇樂德克率洋兵花綠頭各勇載車輪大礮徑
攻西郭門王維圻率常安軍攻安昌門謝國恩率信義
軍攻五雲門景渠及知府楊叔懌督隊由南路兜勦圍
攻竟日轟坍西郭門城堞丈餘酉刻收隊初二日復攻
西郭門連開洋礮轟塌城垣十餘丈斃賊無算達耳地
福獨立橋上揮兵登城賊拚死抵拒正相持間突有黑
夷五六十人助賊環放洋鎗達耳地福腦左中鎗殞命
同時陣亡兵頭一人洋兵四人勇二十餘受重傷者數
十次傷百餘賊勢復熾東關百官蒿塢諸軍紛紛潰退
景渠與楊叔懌退駐斗門後路幾爲賊斷而安昌五雲

烏門山等處賊復日夜竄擾兵無可調景渠選親兵數十及各營親兵中敢死者二百四人帶烏鎗百九十四桿籐牌八面小旂二面前往迎擊六戰皆勝賊大潰竄去是時常捷信義兩軍亦戰無不克賊復由杭州蕭山諸暨調集十餘萬衆來援直抵下方橋柘林等處進逼濠湖花浦橋景渠移駐三江城城匝里餘距斗門三里

有奇賊四面圍撲火光炳天各軍拒之殊死戰景渠連促退守曹江諸軍來援守備張其光所部及定勝常安兩軍並葉炳忠添派外國師惠南適先後至衆心乃定連日四路兜剿斃賊無算燬其卡賊氣始奪城賊不敢

平浙紀略

卷九

三

復出十九二十日蕭山義橋臨浦一路竄賊來援張景渠等督率中外軍攻勦一勝於下方橋再勝於安昌城外四十里賊氛如洗嗣是英國總兵哇樂德克復由上海解來大礮稅務司日意格調來法國洋兵陸續到營正議悉銳環攻而賊黨楊應柯密遣難民持信赴景渠營中乞降願爲內應二十五夜城中火起景渠約會諸軍齊進僞酋周賊率衆開稽山門向蕭山而遁二十六日已刻我軍入城收復卽分軍進攻蕭山賊聞官軍躡蹤追至莫有固志於二月初二日潰走張其光李光等入復其城至是紹境盡廓唯諸暨先經左公遣軍克之

左公疏言達耳地福自上年八月到甯管帶花頭黃頭兩隊練勇訓習洋鎗防守餘姚剿退各鄉股賊上虞之捷亦與有力此次抵營未及一月忠義奮發急攻紹城身先士卒臨陣捐軀請照副將從優議卹又奏浙事之轉以金華爲一大關鍵金華未復之前甯波各軍力攻紹興未能猝拔迨十三日復金華二十三日復諸暨二十六日紹興卽隨之而下浙東肅清規取杭垣自宜由富陽前進而東路亦未可鬆防蕭山臨浦一帶已令葉炳忠張景渠督各軍嚴爲防守義橋仍暫由蔣益澧分兵扼紮蓋自大軍急攻龍游湯溪賊悉調精銳自救故

平浙紀略

卷九

三

閩師得以清溫處甯師得以定浙東然紹興一城遲之又久必告復於席捲金華篳管諸暨之後蓋有三焉紹蕭相去百里城孤不足守一也長江水師直下西渡將斷二也富陽受兵杭州洵懼又當捍其所急三也獨是台州義旗颺舉張景渠以一旅起海上並致克捷泰西人性忍鷙果而不回助攻各洋將迅銳忘死捐軀相繼以海邦之烈士爲中夏之鬼雄均有足多者焉

同治三年二月二十三日奉

命督辦軍務閩浙總督兼署浙江巡撫左公疏言嘉興府城

經蘇軍於二月十七日大舉環攻晝夜不息十八日轟

恩城坍北門蘆席漚城垣十餘丈申刻由東北兩門衝殺而

入署杭州知府陳思燝督率章文盛所部會合蘇軍併

力攻勦當將郡城克復臣維嘉興浙西腴郡爲官軍與

賊所必爭賊首僞榮王廖發受前往蘇州納款迨蘇軍

壓境旋即中變杭湖賊酋復調悍黨赴援並冀擾動海

甯桐鄉新復各縣勢頗猖獗幸賴蘇軍嚴扼嘉郡東北

兩面力破堅城俾平湖乍浦海鹽新復各區不致重遭

擾害厥功甚偉所有在事出力員弁兵勇應由江蘇撫

臣保奏浙軍於收復桐鄉海甯後分守兩城復擊敗杭

湖援嘉之賊四品翎頂蔡元吉所部縱橫血戰勞績甚

著可否由臣查明保奏出自

恩施元吉力禦援賊事見第六卷中先是江蘇巡撫李公鴻

章令編修劉秉璋常鎮道潘鼎新及總兵張遇春副將

俞濟楊鼎勛進圖浙江之嘉善同治二年七月十二日抵楓

涇北官塘天雨賊大至鼎新擊卻之十三日數道並進

賊不出嘉善賊來援水師敗之鼎勛等設浮橋渡河攻

踞賊礮毀其三壘七卡於是嘉興平湖乍浦之賊至者數萬分踞千窰西塘繇亘二十里十八日秉璋等慮楓涇進西塘太湖水師二營來會淮揚水師張元龍由蘆魁塘攻西柵楊宏勝朱開泰由揚漚攻北柵十九日我軍方出千窰賊驟至水師礮卻之烏涇塘與西塘賊出南柵鼎勛與戰傷膝賊亦少卻水師入烏涇塘登岸斷千窰之道賊首尾不相顧以炸礮猛擊之遂潰張元龍楊宏勝等破北西柵賊壘斬馘千餘賊竄千窰二十一日鼎勛復破之獲偽王宗及羅天安敬天福登天侯等酋斬之捷聞劉秉璋擢侍講潘鼎新加按察使銜張遇

春以下獎賚有差嘉善城東有鎮曰張涇漚賊以四營守之十月二十日劉秉璋由楓涇往攻不利參將王玉林死之秉璋傷股嘉善賊遂出犯秉璋軍累擊賊於千窰之鳳洞橋大通橋及東西茜涇互有勝負十一月初四日復攻張涇漚潘鼎新遣水師爲助始克之初平湖賊酋陳殿選遣人乞降於劉秉璋潘鼎新不許十月殿選出至大柳塘求見秉璋鼎新言城中不願投誠者半請謀定舉事鼎新等察其意誠許之及茜涇張涇漚之捷陳殿選復請師期初六日潘鼎新遣夏金標潘鼎立率部進屯廣陳觀動靜劉秉璋遣聶桂榮張應魁由楓

涇進新球楊鼎勛出隊千審秉璋自進兵鍾球以綴嘉湖各賊而絕陳酋反顧之心初七日令徐道奎率水師夜偪平湖城下殿選卽勒所部分圍各賊館開門迎我軍入城將賊洗天安陶雲從翼天福江之源蓬天福胡金鏘剛天安沈本立各館悍賊誅殺殆盡督令合城薙髮殿選率陳殿魁王應海錢玉興朱六玉等所部萬餘人悉降次日遂將平湖收復殿選初約乍浦賊酋熊建勛同降建勛未決十月二十六日茹天福甘酋密約內應請我軍夜襲乍浦十一月初五日鼎新夜督軍銜收疾走過東門外殺入牛橋賊壘賊睡中驚起盡殲之比

抵乍城賊已有備甘酋謀不得發鼎新踏毀北門外三里橋賊壘四殺賊數百餘衆逃往沿海山坳自相踐踏而死者無算熊建勛氣懾始乞降鼎新令主簿趙濟川入城宣諭賊衆初十日復令丁壽昌唐宏成劉思洲帶三營屯城下自督潘國揚一營勒兵平湖南門外以俟十二日建勛率衆薙髮獻城遂收復乍浦次日鼎新令建勛隨唐宏成帶隊往海鹽城中踞賊多建勛舊部宏成等反復開導立率衆薙髮迎降海鹽亦於是日收復澈浦鎮踞賊聞風震恐亦降之鼎新秉璋以四營守平湖三營守乍浦二營守金山衛以固蘇省門戶海鹽一

城暫令降衆自守李公疏言平湖乍浦海鹽各城相爲犄角與浦東金山接壤爲滬防後路浙省東北沿海屏蔽平乍賊衆各有萬餘城濠堅深糧支數月設憑城拒守圍攻匪易降酋陳殿選等懾我軍威次第納款浙西踞賊藩籬已撤皆有首尾狼顧之象據各降酋皆願率衆往攻嘉興臣已令潘鼎新劉秉璋等分別遣留相機督勦惟聞僞歸王鄧光明僞相王僞獎王等賊三萬餘衆入援嘉興意圖復奪各城海鹽澈浦去蘇較遠檄令潘鼎新等隨時酌調應援並令程學啟速攻平望嘉善以牽制賊勢各降酋均有微功並非賊中著名大頭目暫留助勦尚易控馭請免罪予獎

平浙紀略

卷十

四

上俞之陳殿選卽易名陳恩榮云於是楊鼎勛屯軍于密洪

家灘以截嘉善嘉興之道嘉善賊酋陳占榜余嘉鼇密

詣吳毓芬請降不許及總兵程學啟克平望占榜懼請

益力獻子爲質毓芬以白李公公命會學啟鼎勛率小

圖之二十七日勒占榜盡撤城外賊營秉璋鼎勛率小

隊往列東西門毓芬軍入自南門二十八日學啟秉璋

鼎勛咸入乃收復嘉善縣城而潘鼎新之軍方克沈蕩

新豐鎮當嘉興賊犯海鹽平湖時往來屯營於此海鹽

守軍旣敗僞會王之衆僞王宗陳炳桂僞蔣王陶金僞

天將錢得勝併踞沈蕩日犯瓊城二十四日唐宏成督熊建勛等攻沈蕩盡毀其巢二十五日鼎新率師由乍浦勦新豐距平湖十八里二十六日潘國揚等攻中路炸礮塌其牆丁壽昌等自新篁里潘鼎立等自竹林廟分攻其南北賊皆潰追殺之阻於水鮮逸者時嘉善旣復劉秉璋率所部進屯新豐程學啟令劉士奇屯王江涇十二月二十一日嘉興賊偽榮王廖發受出犯秉璋鼎新大破之發受乞降李公命學啟偵之賊布守嚴未可信決進勦學啟以四營與李朝斌水師進屯金橋秉璋與吳毓芬七營進屯七里店鼎新軍由海鹽平乍遙

應之三年正月十九日學啟軍方築壘北門廖發受及偽挺王劉得功以礮船前犯並由西門出賊數千學啟分禦之陣斬賊凌天義秉璋軍亦移駐朝陽廟及會龍橋二十三日鼎新率三營來會時東北門賊壘尤多議以學啟軍與淮揚太湖水師分攻城北杉青橋御花園端平橋李公弟昭慶攻秋涇橋秉璋鼎新所部攻城東吳涇橋東塔毓芬攻合歡橋二十四日學啟軍分五路進戰未克城賊萬餘出援猝爲所撼學啟率親兵由小西門繞出賊後賊卻顧前軍攻益急乃破小西門北門賊營七禽僞朝將劉得福慕天義賈慕仁陣斬驍賊千

餘奪獲大礮五十守備姜寶戰不力斬之以徇昭慶軍
三路達秋涇橋賊適饋火藥入其營我軍乘而入賊兩
營皆潰吳涇橋合歡橋賊踞四營秉璋等方攻克大石
壘賊亦由東南門出援擊走之追至鹽倉橋而合歡橋
賊阻河死守毓芬令吳兆楣伏河干發炸礮斃登壘賊
吳毓蘭率死士渡河礮船繼至營亦破是日戰甚力營
官劉士奇周正林潘國揚黃士林聶桂榮皆被重創東
北門賊亦殲除殆盡湖州賊圖援嘉興屢擾我後路水
師敗之學啟益督各軍圍城築礮臺二十八日炸礮壞
城垣十餘丈水師已設浮橋而渡學啟令何安泰劉士

奇率千人踰河乘城自率陳忠德王永勝繼之賊然火
藥傾而下不克登安泰猝中洋鎗死之水師李助發周
正林趙三德俱創甚軍士死者數百乃罷攻湖州賊復
犯盛澤圍王江涇營二十九日學啟令王永勝鄭國魁
往敗之陣亡總兵何安泰副將郭興發均請卹安泰爲
學啟軍名將治軍嚴無擾其喪歸嘉興民有泣送者並
請建專祠嘉興賊旣死守官軍多傷亡又遇雨兵不得
舉二月十五日雨霽學啟卽令各軍薄城是夜親督梁
安邦於端平橋下築護礮月臺黎明賊覺矢石交下時
臺已築竟學啟手然田雞炸礮斃賊數百十六日學啟

與劉秉璋李朝斌等會議猛攻令王永勝率陳忠德張行科龔生陽攻城東北以葉廷杓阮炳福繼之劉士奇率陳有昇梁安邦左日昇彭連升攻北門以朱寶元于奇泮繼之吳毓芬率吳毓蘭吳兆楣陳占榜余嘉鼈羅義勝攻東門別遣張家瑜張自全堵禦新陞援賊兼遙攻西門以分賊勢水師歐陽利見率謝世彩鄧全楚費金綬等與陸路各軍夾擊劉秉璋潘鼎新令錢玉興朱六玉扼東門城外南湖之口萬重暄曹廣澤袁發由南湖南岸進攻王古魁潘鼎立夏金標劉廣福由東馬橋北岸潘國揚唐宏成丁壽昌黃仕林劉鳳翔王應海由

東馬橋南岸三路進攻水師蔡渭川李洪壽徐道奎等會合李朝斌所部礮船駛入南湖分攻西南東南城角賊於各堞口排開巨礮並擲火藥桶以拒我甚力是夜學啟令於沿城河添築月牆三道賊鎗礮甚密我軍縛草膝行且避且築自此各軍晝夜環攻不息十七日黎明學啟自率親兵督教練洋人備雷用開花礮三面轟擊立燬城上礮臺二十餘處壞城垣百餘丈賊爭負土堵之我軍薄城數次皆不得上申刻學啟揮軍若將登城賊以洋鎗密攢缺口我軍乘勢連開炸礮賊血肉雨飛仍更番死拒夜四鼓學啟督親兵成浮橋兩道賊鑿

城根實礮於中攔河阻截徐佩璆乘飛划猝奪其礮十八日湖州賊酋黃文金率黨萬餘突由新脰直撲我軍後路時攻城正急學啟令張家瑜張自全擊走之城賊漸不支學啟促各軍梯而登死亡相枕籍學啟憤甚自督親兵踰浮橋直上賊鎗子飛中左腦昏絕昇歸營劉士奇王永勝等急率隊以木筏分渡由城西北角先登吳毓芬陳忠德分撲西北兩門陳有昇龔生陽均中鎗裏創奮進炸礮中城賊火藥倉賊眾駭亂呼聲如沸劉秉璋潘鼎新各率所部乘勢拔棹過濠入東門甕城李朝斌抽撥水師登岸由南門踰牆而進廖發受猶率悍

賊數千巷戰韓杰持令大呼各軍奮勇格殺劉士奇王永勝歐陽利見等擊斬五千餘級餘賊竄向西門復經陳有昇梁安邦張家瑜與李朝斌水師攔截各軍分路進擊悉就禽誅礮斃偽挺王劉得勝於城獲偽榮王廖發受於并礮之遂於是日申刻克復嘉興郡城二十一日李朝斌等復將新脰四亭子一帶賊壘塌平賊悉遁回湖州李公疏言臣查嘉興府爲東南財賦重區險固足食易守難攻自咸豐十年賊陷踞後黨悍且衆提督張玉良曾以數萬軍潰於城下此次偽榮王廖發受等勢窮負嵎嗾衆死守又有湖賊來援我軍腹背受敵程

學啟督軍急攻誓死必克始得速下名城盡殲驍黨出奇制勝忠勇謀畧突過尋常從此蘇滬之防漸固杭賊糧路已絕羽翼益孤我軍越境苦戰傷其精銳於大局不無裨助請將程學啟劉秉璋李朝斌潘鼎新以下獎賚有差並

賜卹陣亡將士五月初二日李公疏言臣於四月十二日回蘇因湖州賊氛尙熾將蘇城防兵復加整練准閩浙督臣左宗棠咨稱浙軍擬卽日進徧湖城東南兩面漸次移軍而西湖州旣有重兵則嘉興可無須蘇軍屯紮請酌調進規長興臣先派道員潘鼎新各營分守吳江平

平浙紀略

卷十

九

望侍講劉秉璋駐守嘉興專防湖賊內犯之路常勝軍現經裁遣英領事方請添兵防守上海劉秉璋一軍旣可騰出擬卽令移防松滬近偵湖州踞賊分竄城北楊澗大澗一帶潘鼎新由平望分紮南潯震澤適當其衝防勦正緊浙軍尙未進徧城下臣未便派軍深入會攻惟查長興縣在湖州西境與蘇之宜溧皖之廣德均屬接壤湖城與長興踞賊犄角又恐從此路竄出自應揀派勁旅相機攻取以掣湖州賊勢於是遣郭松林劉士奇王承勝楊鼎勛三十營由宜興分道進攻長興並調李朝斌帶太湖水師數營歐陽利見陳東友等淮揚水

師四營由夾浦口會合進勦嗣慮潘鼎新軍尙單弱復令聶桂榮等水陸五營往屯濱湖之吳淞以應之正在布置間初七八日湖州賊酋僞立王黃文英僞樂王譚應芝等糾黨數萬竄踞吳淞擾及陸家灣軋村殷瀆村丁公橋等處橫亘數十里初八日賊圍陸家灣練勇營道員丁壽昌會水師康嘉賓由南潯率礮船往援自帶行隊繼進轟斃賊甚多練勇出壘夾攻賊敗走拔出難民數千壽昌復令劉思桂劉秉權由兩河橋車駕橋出不意抄擊丁公橋之賊望風驚潰禽斬無算乘夜並襲破天到橋賊卡禽其僞朝將史得成初九日潘鼎新馳

赴南潯聶桂榮等亦至偵知吳淞踞賊東竄令丁壽昌等進軍迎勦行過南貨港賊衆如蟻我軍分路兜殺斃賊數百追至殷瀆村暴雨收隊哨長汪立本陣亡別遣唐宏成戴春林等由溪港小路進抵夫廟港遇賊各有斬獲是夜賊仍在殷瀆村一帶焚掠初十日晨鼎新令唐宏成韓照揚等由湖塘直趨吳淞聶桂榮率曹光澤王應海劉廣福等由丁公橋進攻殷瀆村丁壽昌劉思榮吳秉權繼之徐道奎聶桂林率水師齊進吳淞之賊前阻卡一後結壘三沿塘泊礮船數千民船數百水陸各施鎗礮抵拒我軍頗有傷亡唐宏成激勵士卒奮勇

爭先立破其卡於是唐宏成攻中壘韓照揚攻南壘都司何孝繼率衆躍濠突入將南壘賊禽斬畧盡戴春林等偪濠拋擲火彈肉薄齊登中壘亦破東壘賊奪門而出將乘舟以遁夏金標等揮隊奪獲其船賊之入水者甚衆餘賊沿塘狂奔我軍追至橋漚斃賊千餘聶桂榮等進至殷瀆村賊匿桑林中東伏西出我軍步騎俱不得逞乃列隊村外誘之劉廣福王應海進薄天到橋賊果傾巢來撲廣福等扼橋力戰聶桂榮曹光澤從中路迎擊徐道奎等督水師沿岸環攻陣斃多賊並禽龍衣

賊目一賊棄械紛竄我軍卽屯天到橋偵知殷瀆村後

平浙紀略

卷十

十一

路尚有湖漚可通十一日向晚各營蓐食齊進水師駛至天到橋橫截其前劉廣福等繞過鄉村分抄其後賊出遁三面要擊斃賊甚多破其二壘忽中塘軋村織里各賊來援勢極極猛我軍鎗斃賊數百禽黃衣賊目二敗賊均退橋漚其李朝斌太湖水師亦於初九日由洞庭西山乘風駛抵夾浦口賊於象公廟前後爲石壘各一設大礮當湖口左右夾小河中間作橋立卡以護石壘適天雨朝斌以洋鎗陸隊乘之水師左右兩路分擊中路河窄陳定國轟其前壘賊負阻力鬪陸隊撲登數次均不得前朝斌合斫蘆葦填河抄其後卡親覓水躍上

舳板大呼前進賊鎗礮如雨從礮眼中攀援而入陳定國江福山俱被重創仍兩路猛攻賊不能支先破兩石卡乘勝過橋四面合圍賊竄路旣絕仍以死拒僞烈王江賊中矛死前後石壘一時並破賊殲無遺遂焚其後壘卽前壘駐守次日郭松林劉士奇楊鼎勛等陸軍亦至分屯施溪夾浦王永勝所部進駐湯橋烏溪以防廣德泗安賊援十一日松林等赴長興攻克上莘橋跨塘橋兩卡徑偪城而軍李公疏言浙軍現紮湖州塘南此次踞賊大股出撲獲賊供稱圖犯南潯震澤牽制浙軍後路並擾蘇防經我軍攻毀其巢凶鋒已挫惟楊淩大

平浙紀略

卷十

十三

錢口等處踞賊尚多與吳淩毘連時出劫擾臣飛咨李朝斌酌撥兩營前往兼顧仍令潘鼎新固紮穩進夾浦旣克長興踞賊奪氣現令郭松林等合力猛攻速克此城則湖賊竄路將斷或可以次得手十二日朝斌率水師進次城東北六里之後漾村十四日黎明令陸隊分伏山後先遣千餘人誘戰賊衆由北門小東門迎拒我軍伺近揮伏衝擊追至城根斃賊甚多陸軍分門築壘松林軍東門鼎勛軍東南隅士奇軍北門均距城半里許永勝所部自夾浦口節節爲營援應後路鼎勛又令曾明魁分立兩營於夾浦長興之中曰西莊橋爲浮橋

二道以通前後聲勢賊酋僞襄王劉官方負隅不出十
七十八日湖州賊酋黃文金喉令僞天將陳賊糾黨二
萬由東南路來援自鴻橋至跨塘橋不絕直達城下令
其弟文英糾廣德泗安之賊四五萬由西北路來援依
山築壘曼衍巖谷勢甚鴟張與賊相應松林等會議
分勦約王永勝一軍於二十二日黎明由夾浦繞至新
塘口抄賊之後松林鼎勦由五里橋迎擊湖州援賊背
水爲陣賊奮拒我軍但排開洋鎗屹立不動任其衝突
俟氣衰一鼓齊進陳賊率黨死鬪戰正酣永勝從後馳
至兩面夾擊鎗斃斬獲數千遂將鴻橋跨塘橋沿河傍

山賊營一律蹋毀朝斌水師登陸由磨盤山繞出賊背
士奇亦由磨盤山直逼廣德泗安援賊各壘朝斌率隊
由山梁疾趨而下用火器焚燬賊營煙燄蔽天賊首尾
莫顧士奇分路抄殺擊斃溺斃者近萬西北路沿山各
賊壘亦俱蹋平二十三日各軍方擬於西北兩門外架
浮橋以攻城援賊敗逃未遠湖州賊酋復添撥大股會
合折回以圖再逞於是松林鼎勦與淮南水師迎擊湖
州續至之賊士奇永勝與太湖水師迎擊廣德泗安續
至之賊乘其喘息未定合力奮勦各殲賊數千追殺二
十餘里賊乃遠颺松林朝斌等謂湖賊必爭長興援且

復至定議力攻令廖德旺張正全於西門外王平西舒
義志於北門外各架浮橋三道賊鎗礮噴筒並發頗傷
士卒哨官王備興中礮死張正全鎗中左臂仍裹創督
工是夜橋成二十四日黎明游擊劉玉隆同洋人備雷
由城北安設炸礮靠城轟放士奇永勝各分二營松林
分三營鼎勛進攻北門松林自攻南門士奇與李朝斌
水師合攻西門永勝攻東門淮揚水師及松林所部礮
船攻東南東北兩隅朝斌復分一營於北門外河邊排
大礮助備雷轟攻不兩時卽塌城垣十餘丈鼎勛督隊
渡河鼓噪而上賊以鎗礮密排缺口並擲燒火藥桶死

平浙紀略

卷十

十四

拒參將向大鵬游擊周金才俱中鎗洞胸殞並傷總兵
高占魁右臂將士傷亡數百人營官梁安邦于奇泮易
用剛李長樂陳忠德黃廷杓高蘭亭等身先士卒肉薄
以登各營奮勇繼之朝斌松林士奇亦率所部三面緣
梯齊上于奇泮鄧明遠王平西均各裹創力戰賊面而
受敵尚無退志松林率宋德鴻首先攀城入于總劉隆
興隨之爲槓木擊破額顛而死各軍一擁畢登將城內
悍賊次第禽斬其由西門衝出者朝斌預設伏悉殲之
遂於是日午刻克復長興縣城李公疏言長興毘連蘇
皖枕山帶湖屏蔽湖州與泗安廣德爲犄角是以堵輔

各酋糾黨力援城外重圍壘嶂桑田陰翳汶港紛歧兵勢頗難展布若相持曠久恐生他變賴水陸諸將協力同心於炎天烈日中奮迅猛攻傷亡枕藉不稍回顧自克復夾浦至城下之日僅及半月神速赴機殲賊殆盡實屬勞績卓著諸將楊鼎勛李朝斌郭松林等以下及陣亡之參將向大鵬等優加獎卹李公旋奉

旨撥兵會勦金陵於六月中由太湖至長興察看地形知湖州賊勢尙盛附城三十里面面堅壘其時浙軍方規孝豐安吉斷賊竄路尙未急攻湖州李公以蘇境與湖州接壤中隔太湖有李朝斌水師禦之其太湖西岸由長

平浙紀略

卷十

五

興而達宜興溧陽最爲要衝令郭松林楊鼎勛分屯長興城內外並調防守溧陽之道員吳毓芬水陸五營移駐夾浦口又以太湖東岸由吳淞南潯而達平望潘鼎新一軍分扼數處尙嫌單薄復調劉秉璋松江七營進屯平望如浙軍由湖州東南進攻則西路郭松林各軍與東路潘鼎新各軍即可聯絡並進會同李朝斌由大錢小梅各口進感湖郡西北以勦爲堵分賊勢而助長圍並謂長興距湖州六十里形勢扼要賊與我所必爭既經克復若不分兵他往自應乘勢進攻已而江南軍克金陵李公遂於七月中旬檄劉銘傳各軍攻廣德郭

松林各軍攻泗安潘鼎新劉秉璋各軍分進晟舍大錢口三面圍逼湖州會合浙軍夾攻潘鼎新克晟舍沿湖東岸賊營皆潰劉秉璋一軍由吳淞楊淩進屯大錢口道員張樹聲一軍又由南潯進屯織里以壯聲援各營連日出隊迭有斬禽李公見湖州賊勢趨重西面尹隆橋大德橋一帶爲通泗安廣德大道賊節節聯營以護竄路於是令郭松林王永勝劉士奇楊鼎勛各軍由呂山進攻尹隆橋扼其中間要害賊已先於尹隆橋大河南岸築十餘堅壘又於橋頭築石卡及月牆一道上流橫塘渡別築多壘多架浮橋以爲尹隆橋援應永勝遣

軍與賊對壘賊復於月牆左右增立兩營牆外掘濠二道寬約二丈引灌河水深可滅頂排釘木城繞壘五匝外加梅花椿數十層防守極固松林等日夜趕築長牆調齊劉玉龍所部開花礮隊轟攻十五日未刻賊壘稍缺守賊於地窖中堅伏不動湖州大股賊衆憑河埋伏勢若長蛇營官廖德旺高占魁舒義志李長樂文茂林等奮勇先進拔椿偪濠因水深不能鳧渡伏賊齊起環施鎗礮哨官張祖述陣亡高占魁舒義志等皆受重創天晚收隊十六日我軍復用炸礮轟擊于奇泮顏邦桂張正久王受釗等衝鋒齊進賊鎗礮愈密我軍三面受

敵傷亡不可勝計是夜松林令李長樂宋德鴻等鼎勛
令王萬釗周河清等率隊潛拔濠外木椿十七日激厲
衆軍鼓勇直前並令呂山大德橋橫塘渡各營嚴截援
賊已刻炸礮轟缺賊卡一處我軍各負蘆葦填濠而過
一呼直抵內濠賊層層狙擊士多死亡郭松林鎗傷左
膀猶揮軍疾進忽大雨如注火藥皆溼乃收隊湖城黃
文金復挑悍賊數千繞出呂山後路八字橋阻我饗道
十九日松林令李長樂文茂林顏邦桂三營馳往李家
巷搶築營壘又令各營出隊助之辰刻築壘半就賊衆
由洞子門蠡擁來撲我軍迎勦兩時斃賊甚夥參將何

平浙紀略

卷十

七

錫恩陣亡各軍憤戰愈厲賊潰退二十日胡賊賊大隊
自尹隆橋迤連八字橋洞子門沙水橋白龍洞一帶袁
延二十餘里傾巢來爭松林飛調易用剛宋德鴻周蘭
亭等迎敵自督李長樂等接應劉士奇王永勝各率兩
營由呂山夾擊鼎勛督守尹隆橋老營已刻山上賊旗
搖動羣賊吶喊衝下易用剛等整隊接戰鎗礮對轟用
剛身受重創松林率李長樂等捲旂突入來往縱橫並
令王平西礮船由河助轟斃賊無算賊陣漸亂永勝士
奇率隊由山脊翻下疾如風雨賊衆倉皇紛竄乘勢掩
殺禽斬數千永勝追過洞子門別股賊由山後小路出

援松林分隊擊走之將士傷亡百餘李公偵知賊有奔竄之意飛檄潘鼎新劉秉璋等相機進攻二十六日夜鼎新會合日月山浙軍總兵劉樹元等攻拔昇山賊壘瞭見城中火起卽督隊追勦二十七日清晨追至八里店賊回拒水陸各營併力夾擊大破之追至三里橋壘賊望風奔潰會李朝斌劉秉璋張樹聲等各進大錢口攻破賊營十餘並至城下沿途斃賊無算賊擁擠入城閉門不及潘鼎新劉樹元等各率隊奮追由東門殺入賊賊已啟西門逃去遂於是日已刻克復湖州郡城其浙軍事畧見第七卷中李公疏告捷潘鼎新劉秉璋

平浙紀略

卷十

六

李朝斌張樹聲以下並請獎叙得

旨嘉允李公麾下多猛將精兵乘新製火器之利自克蘇州

銳氣無前以境接浙西不分畛域先遣劉秉璋潘鼎新

兩軍招降平乍并復海鹽嘉善蘇浙之路已通復任程

學啟攻拔嘉郡百戰驍將先登傷殞亦足見行師之猛

迅矣其時浙中悍賊悉萃杭州餘杭兩城我軍血戰其

間日不暇給湖州未下海甯桐鄉新附蔡元吉之戰雙

橋劉樹元之守烏鎮但能遏湖援賊斷杭餉道遙爲蘇

軍聲援至於靡堅克銳速下名城使我軍無西顧之憂

杭賊失右臂之助翦除黨羽賊勢益孤微蘇軍之力不

及此遂乃指揮諸將水陸並舉攻復長興會克湖郡爰
次其事以識中興將帥和衷宏濟之美焉

平浙紀略

卷十

九



平浙紀略卷十

本其事以識中興將帥和衷宏濟之美焉

平浙紀畧卷十一

同治元年十一月二十三日奉

命督辦軍務浙江巡撫左公疏上會勦竄徽股賊並克復績溪祁門之捷自皖南告警左公卽調駐守遂安道員王文瑞所部全軍於九月移屯草市爲歙休婺三縣交界之所相機援剿十月旌德被圍旋解時有股賊由昌化闖入徽界糾合竄擾旌德之賊於十月二十五日突陷績溪王文瑞卽會皖南鎮總兵唐義訓馳勦師至臨溪二十八日前隊遇賊生禽數十二十九日賊復來犯敗之禽斬數百十一月初一日官軍分出擊賊唐義訓由

平浙紀畧

卷十一

一

左王文瑞由中朱聚賢由右賊撲中路甚猛我軍陣斬先鋒賊數十黃衣騎馬賊目一營官楊海泰龔隆貴王明輝等怒馬陷陣賊勢少卻羅瑞山郭德馨等復從山凹橫擊朱連芳陳清泰葛蘭世賀章彬鍾邦林方有才等奮勇衝殺賊陣大亂奔還績城唐義訓朱聚賢左右截之各有斬獲計殺賊千餘解散千餘生禽二百餘奪獲馬匹數十洋鎗礮二百餘旂械無算因雨收隊是夜三更賊棄城遁逐北至叢山關而還初二日收復績溪禽賊言此股賊首爲巢洪陳三賊洪賊已被擊斃其鋒大挫初五日王文瑞仍回草市旋報古賊率黨近萬由

旌北竄入太平縣之黃花嶺初六日文瑞冒雨拔隊由休甯前進初七日至漁亭聞駐屯祁門之良字兩營已出嶺迎勦文瑞以良字營兵單不守而戰慮有疏失乃星夜馳往援之行距祁門二十五里偵知良字營被賊衝散縣城已陷文瑞因軍火在後山徑滑遶未便乘夜深入仍回駐漁亭會商唐義訓併進左公以祁門旣失徽郡餉道中梗饒景一帶堪虞亟令劉典一軍輟蘭谿之攻由華埠趨婺源助勦而王文瑞等已於初九日進屯花橋令勇士數十於近城山上放擲火箭火彈擂鼓以助軍聲賊驚疑四更後啟西門逃竄次日收復祁城

分軍追之斬尾賊二三百文瑞復遣軍出桃樹店以扼其繞竄浮梁景德之路時江西巡撫沈公葆楨亦調回道員王德榜及接守遂安之同知王沐各軍分扼玉山景德左公遂令劉典擇駐滄遂蘭谿適中之地兼顧邊防二年正月二十七日左公於克復武義永康等縣疏內言劉典一軍仍須由嚴赴徽爲肅清皖南之計必俟皖南局勢漸定江皖邊圉又安然後臣軍無後路之虞其時賊由桐廬併趨皖南太平石埭之賊亦時窺祁門夥邊界二月初一二日爲分駐漁亭總兵丁長勝副將

王明輝等擊敗初十日賊從藍湖米坑而來將窺祁門

北界新授江西吉南贛甯道王文瑞令郭德馨楊海泰
羅瑞山喻勝榮等迎擊行至半途卽與賊遇郭德馨怒
馬衝入賊陣連斫數十賊各營乘勢衝殺賊大敗潰官
軍躡蹤追之比近藍湖賊復回關藍湖之左有數賊騎
馬張蓋突出指麾羣賊向前抗拒德馨馳斬其一軍士
共攢矛刺之數賊皆斃餘賊翻山逃逸喻勝榮羅瑞山
等各率隊馳至截殺與德馨合隊追過米坑十餘里沿
途共斃賊千餘生禽七十餘內有僞軍政司蘇四達黃
齊升美天福張北湖被天福張小滿謙天福鍾有朋賜
天燕易明陽僞丞相王大古等賊誅之陞崖落澗無數

平浙紀略

卷十一

三

奪獲騾馬十三匹擡烏鎗一百餘桿旂幟三百餘面刀
矛尤夥左公疏言皖南此捷胡古兩酋之勢頓衰惟徽
休間賊眾日多花旗一股計已合併而譚星復由昌化
出千秋關竄徧徽州徽防各軍紛然告警劉典一軍前
經調回嚴州現由威坪前進臣又檄催其新募之勇由
廣信疾趨婺源或可力遏奔衝二十一日劉典行抵屯
溪偵知賊已偪近徽城由巖寺街上萬安街北至許村
南至東關四五十里一片賊氛禽賊言僞金王鍾賊踞
潛口僞主將賴賊踞巖寺僞襄王劉官方等踞長林萬
安街等處眾約十餘萬典以賊未知我軍猝來利速戰

卽於二十四日分四營進屯梅林杜賊由休甯南路繞竄並與唐義訓王沐約期會剿二十五日令黃少春張聲恒率所部攻巖寺李耀南黃有功朱尊賢率所部攻長林典白率中營及楊芳桂馬隊從長安街馳勦而下賊方上竄不意浙軍大至卽潰退追過河西始結陣回拒別股賊從山谷中竄出抄我後路典分軍截殺一面督親兵從中橫擊朱尊賢黃有功率隊奮戰賊大敗向山路蹂附而遁時黃少春等已奪據巖寺街後山梁王沐率所部馳至夾擊喻可宗齊蘭禮扼卡截殺賊爭先過橋擠溺死者不可勝計追至潛口始收隊約斃賊近

平浙紀略

卷十一

四

萬生禽三百餘獲馬三十餘敗賊退往許村箬嶺及藍田一帶復分黨進踞潛口劉典以藍田可北趨黟西出漁亭而漁亭僅兩營駐守兵力尚單卽令王沐移駐九鞏橋張聲恒朱尊賢接屯草市以固徽州西南之防三十日劉典移營前進忽昏霧四塞大雨如注前隊已至長林猝不及防賊分數路來撲典率親兵往策應甫將前隊收過小港數十賊騎環繞而來相去不過數丈典及劉大謨劉敬廷數騎左右衝突黃少春等各率所部馳至賊始敗退是役殺賊百餘而參將張顯榮守備金友成左萬明均以身入力戰死其部下陣亡者又八十

餘人三月初一日僞金玉鍾賊率黨萬餘來撲梅林營
壘我軍俟賊逼近急起擊之分軍從山谷左右抄出賊
敗奔追殺十餘里斃賊數百生禽百餘初五日鍾賊賴
賊又糾黨數萬來撲設伏掩出賊後復敗之禽斬如前
並斃瓏天義黃宗保等賊初七日黃少春黃有功等五
營由東關出潛口之右劉典率兩營由長林出潛口之
左賊望見官軍隔岸遙放鎗礮劉典麾軍渡水猛擊賊
棄械狂奔追過潛口十餘里沿途斬馘數百生禽數十
鮮散脅從甚多而潛口賊營於初六夜驚傳官軍至踐
踏死者又數百人逃散尤眾至是竄向太平夥而去典

合黃少春楊芳桂等率所部趨漁亭會王文瑞王沐進
勦黟縣文瑞先於二月十三日分遣總兵丁長勝等出
嶺擊敗藍湖之賊二十五二十六日賊僞襄王劉官方
僞天將劉官福等復竄至藍田胡村山坑一帶二十七
日漸逼漁亭丁長勝王明輝鄧榮達周玉南莫坤和等
督隊迎勦王明輝手斬先鋒數賊我軍乘之賊大敗追
殺三四百生禽四十餘二十九日賊復悉眾來撲直逼
街口並分黨由對岸抄過漁亭之後鄧榮達周玉南等
從街巷中殺出王明輝率所部右出繼之時河水陡漲
迤左山如壁立鄧榮達等繞出賊後奮擊賊墮溺數百

丁長勝盡殲抄後之賊賊愈震駭奪路狂奔我軍四面
蹙之斃賊千數百陣斬劉官福等賊目數十生禽二百
六十餘奪獲騾馬鎗礮旂械無算賊竄回黟城糾合僞
對王馮春元僞顧王吳如孝僞輔王楊輔清等賊謀竄
祁門三月初一初二日至柏溪距祁門二十餘里初三
日王文瑞率軍進剿行近柏溪遇賊力戰敗之躡蹤追
出嶺外遇雨乃還是日往返百數十里殺賊數百生禽
五十七署皖南道葉兆蘭令民團預伏山坳亦搜斬餘
賊二三百而王沐一軍力戰草市屯溪之間克捷頻聞
徽婺士民深感之左公疏言賊虜聚徽休祁門一帶原

圖由此越竄江西幸王文瑞王沐力扼祁門漁亭草市
劉典起赴屯溪得以救歙休之危扼其上竄敗賊多趨
黟與祁門緊接必殲除此股然後可無後顧之虞謀報
甯國府有別股賊續竄績溪而甯國旌德太平石埭等
縣仍爲賊踞其被劉典擊敗者又竄入池州所屬之建
德縣逆氛漸趨江西防務喫緊臣前令王德榜一軍由
白沙關速回浮景冀可稍遏奔衝惟賊數太多占地太
廣浙軍未免爲所牽綴劉典赴徽時臣卽與籌慮及此
若援皖得手賊必由池建竄越宜無分江皖相機援剿
以收夾擊之功倘皖事漸緩浙軍可敷分撥自當星馳

入江共圖掃蕩未幾僞堵王黃文金僞佑王李遠繼等
鉤結太平石埭賴古兩賊由建德踰新安嶺至太白鋪
浦口等處逼近祁門西境黥賊亦時擾祁門東路王文
瑞以賊氛四逼將駐守漁亭各營調回祁門並由王沐
分兵助剿初十日賊蹤西至千佛橋小路口一帶距城
十里十一日王文瑞督隊分路迎剿至七里橋遇賊力
戰敗之追至小路口賊復分眾回拒我軍奮擊數次斃
賊千餘賊殊死戰喻勝榮策馬陷陣手受矛傷哨長彭
友年羅廣林陣亡我軍鼓噪而前羅瑞山郭德馨楊海
泰鄧榮達康榮詔等分道並出擊其中堅復斜包其右

賊乃大潰羅瑞山據隘口截殺賊酋棄馬挺矛怒鬪我
軍四面感之禽斬畧盡後隊之賊紛紛竄走楊海泰鄧
榮達等繞出千佛橋兜剿又殲多賊是役共斃賊七八
千生禽八百六十五奪獲僞印三百餘騾馬二百餘鎗
礮旂械無數劉典一軍肅清徽州北路後亦於初十日
令黃少春等七營進剿藍田之賊斬馘百餘十二日進
剿小溪之賊又斃數十賊由黥西竄橫路楠木嶺一帶
祁門漁亭之間道路梗塞十四日王沐率所部轉戰而
前斃賊二三百而賊之大股萃於黥縣白黥西以至祁
門東又北折而至南境皆爲賊踞且立築堅卡以阻漁

亭進軍之路劉典慮王沐軍單卽令黃少春等各營進駐漁亭助之張聲恒齊蘭禮移駐九鞏橋自率親兵於十六日馳抵漁亭登山瞭望謂賊眾我寡非速戰不可遂於十七日率黃有功廖渭臣楊芳桂黃少春喻可宗劉昌選李良平張福齊王沐朱明亮等分路進剿卡中出賊千餘布列山巔以扼我師王沐率所部奮擊賊敗入卡典令各營梟水攻卡而城鄉數萬賊眾大至黃少春率軍沿崖左下中右兩路齊進賊潰奔典急毀賊卡令黃少春率所部攻四五都之賊王沐朱明亮率所部攻八九都之賊而自率黃有功楊芳桂劉志友等各營

追賊直至黟城下賊回撲數次均敗我軍乘勢奪門而入賊由東門竄走時王沐等勦賊獲勝追至大園黃少春等勦賊獲勝追抵城東又合追十餘里始收隊小溪有賊千餘來撲爲張聲恒擊敗餘賊向羊棧嶺方干嶺一路竄去共斃賊四五千解散脅從甚眾獲賊遺米一萬餘石騾馬五十餘匹十九日王沐率所部與朱明亮黃有功廖渭臣三營進屯黟城右山築壘未竟賊糾黨萬餘由原路竄回分撲右山王沐等禦之賊敗復還殊死戰黃少春等繞出其後擊之始駭而奔追十餘里殺賊數百生禽數十據言屢爲官軍擊敗尚拚死回竄入

嶺者以太平古賊扼其去路必欲嚇各賊竄越江西並加騎賊來助而別出大股潛竄徽州休甯以撓官軍後路故也二十四日偵知黟之十都王村蘆村等處賊已築壘有久據之勢二十五日劉典令各營進勦時曉霧迷漫不辨行徑賊見左路有官軍至出壘抗拒黃少春率所部奮擊張福齊乘間破其一壘李良平招降二百餘人賊悉眾來撲李耀南楊芳桂馳至助戰王沐黃有功陳瑞和廖渭臣朱明亮截住去路前後夾擊陣斬綯天義古文祐等賊賊奪路走黃少春等追至羊棧嶺賊回拒復敗遂竄出嶺計共破賊壘二十一斃賊近千生

禽百餘拔出難民無數二十六日有零賊回竄李耀南等擊斃三百獲僞主將林賊誅之是時賊由池建竄偪石門而青陽等處之賊亦併上竄饒景戒嚴王沐已率軍回援旋報賊踞石門陶溪渡茅屋嶺規田街等處典遂留知府朱明亮與王文瑞扼守祁門令張聲恒軍湧亭李耀南陳瑞和軍屯溪以固徽婺之防而自率所部四千人由婺源之清華街田路以出景德鎮偵知賴巢兩賊率大股擾及高橋洗馬橋等處距景德二十里典卽於五月初九日進駐洗馬橋適道員席寶田率所部及仁右營進扼淇源距規田街四十里約次日會勦而

賊聞浙師至先於夜間分路潛遁典遣隊追之斬其尾
賊數十獲馬二百餘賊竄鴉橋爲江西軍擊殺百餘王
沐復追斬數百餘賊退往斜谿而大股仍盤踞陶溪渡
結壘自固典以江西軍駐賊對岸足以遏其前衝必分
一軍從崇光渡後路進勦乃可收夾擊之功遂與席寶
田等定議進軍值斜谿港口橫湧壩等處之賊回竄建
德於是黃少春聶邦光楊詠春王德榜劉勝祥等進屯
橫湧壩陳家墩劉典督黃有功楊芳桂楊在田廖渭臣
等於十五夜拔營十六日會軍進勦崇光渡賊壘前隊
黃少春王德榜等捲旂疾驅乘賊不備連破三巢五營

殺賊八九百生禽百餘奪獲騾馬五十餘賊敗走又被
黃有功等截殺數百餘賊向石門竄去先一夜賊僞堵
王等撲席寶田新壘力禦敗之是日復出隊綴賊使不
暇相援十九日諸軍會攻陶溪渡賊於一大壘中包數
小壘長約數里小港之西又築五壘以爲犄角我軍環
攻數時賊伏不出二十三日典令各營移屯茅屋嶺二
十四日約道員屈蟠及席寶田韓進春等分路直撲賊
壘拔開椿籤三十餘層踰濠而進賊鎗礮如雨副將喻
可宗陣亡環攻數時賊壘垂破復完者數四我軍受創
者多乃收隊典率各營涉陶溪渡移屯賊壘之西席寶

田進偈其東賊於二十五日向洋塘石門而適典派七營與席寶田等追勦擊斬及踐溺死者甚眾二十八日王德榜黃有功軍至洋塘擊拒賊敗之斬首百餘級以石門雞包包等處援賊並至遂收隊典令黃少春四營馳助雞包包之賊先遁三十日各軍進攻石門賊壘負固不出我軍放火箭焚其柵賊驚擾棄壘而走逐北里許值鐵鑪岡賊黨來援併力回戰又敗之賊趨嶺紛竄追殺賊馬步千餘直至鐵鑪岡賊眾尙二三萬悉向彭澤縣境竄去前後共斃賊數千拔出難民萬人賊自陶溪渡石門蔓延彭澤湖口都昌等處退無所掠必欲竄

擾江西腹地我軍乘勝深入賊喘息未定旋復奔走於是浮梁鄱陽皆得廓清都昌之賊亦聞風下竄前浙軍入皖多雨軍行泥濘無日不戰至是天旱水涸疫氣盛行左公疏言李榕一軍現駐湖口江忠義一軍已入江西兵力較厚阻前躡後或能聚殲惟賊由彭澤可橫竄建德以出祁門劉典尙須防宣歙一路未宜深入自援江以來士卒冒暑遘征病者殆半勞瘁異常擬令稍爲休息確審賊蹤所向以定進止江西敗賊果回竄石埭太平與原踞各股合隊乘間復犯徽境六月十六日僞奉王古賊僞胡將江賊朱賊等率黨萬餘竄至郭村十

七日晨卽由羊棧嶺樟嶺竄入黟縣勢甚剽疾王文瑞約會分防九弓橋漁亭各營於四鼓出隊往剿十八日辰刻行距黟數里見城上旂幟林立遠近村莊皆爲賊館文瑞急令張聲恒丁長勝王明輝朱明亮賀章彬分張左右翼自率親兵督喻勝榮鄧榮達等並進甫成列賊蜂擁出犯文瑞揮隊擊卻熊常富從村後抄襲賊驚走我軍追至大小南門奪關而入斃賊百餘復追殺出城朱明亮率馬隊從外截擊又斃百餘賊之先據官軍舊壘者丁長勝屢擊不動張聲恒分兵繞出其後喻勝榮等又至賊乃潰正掩殺間而後路蘆村際村宏村等

處之賊分道來援各營整隊迎戰良久朱明亮丁長勝等復左右抄擊賊大敗棄旂械塞路追奔二十餘里是夜駐軍城中十九日王文瑞督各營追出羊棧嶺外僅斬尾賊餘黨奔回石太老巢是役也共斃賊千餘生禽三百餘解散近千獲騾馬三十餘賊自上年盤踞皖南每思就食江西且以牽制金陵浙江官軍之勢屢受重創狡謀未已劉官方等賊徘徊於彭澤建德之間其僞堵王祐王金王等賊廬聚湖口與江李兩軍相持雖屢戰獲勝賊亦負岫自若而我軍自攻克陶溪渡賊壘後黃少春楊芳桂等六營進駐梅源橋屈蟠一軍進駐章

田渡席寶田一軍及仁右營進駐洋塘韓建春一軍進駐陳家嶺賊踞上下彭青山橋蕭家嶺等處爲湖口聲援劉典以秋成將屆恐賊刈湖口彭澤都昌之稼則民食寡而寇糧益滋爰約席寶田顧雲彩兩軍於七月初一日進攻青山橋賊巢出其不意奪卡而入賊驚惶失措分兩路竄走官軍追殺十餘里斬馘二千餘生禽五百餘解散脅從無數奪獲牛馬二百餘時上下彭賊黨來援劉典督親兵暨仁右營擊退斃賊百餘賊竄至祁建兩界之王家村彭澤之賊退竄馬當古牛嶺都昌湖口之賊退竄彭澤惟上下彭等處尚有賊踞初四日席

寶田顧雲彩乘夜進剿大破之僞佑王李遠繼率死黨來援復爲我後軍擊敗斬首千餘級各賊紛紛回竄江境肅清左公以徽防尙單恐乘虛內犯令劉典仍由清華街一路回軍以固徽浙之防疏言江西都昌鄱陽彭澤湖口各境北阻長江西臨鄱湖南隔昌江皆有水師防禦賊鼠竄其間三面皆水惟江西之浮梁安徽之黟祁可爲旁竄之路建德石埭一帶可爲退竄之路臣始令劉典嚴扼嶺路以保徽休祁黟如賊入江西則力保浮梁以杜四竄後令其扼浮北建德之衝以要賊歸路而牽掣之亦形勢所在不得不然也劉典曾從臣用兵

江皖熟悉地方形勢是以所向有功賊憚後路之塞故退竄亦速良由江忠義遮之於前而諸軍要之於後足以制賊死命故也偵賊仍欲由石太竄入嶺內亦有謂其將趨廣德以赴金陵之援者臣維石太一帶無糧可掠勢難久踞能偏其下竄廣德以重兵扼之則徽甯之防可固卽浙師攻取湖州亦較易矣八月初三日劉典率軍先後抵休分屯漁亭萬安街等處初七八日青陽之賊由香口琅田竄黃嶺城安八都墟一帶距小樺嶺大洪嶺均止十餘里初九日王開琳率所部葉兆蘭率民團前進初十日黎明兩路同時踰嶺遇賊前隊突擊

平浙紀略

卷十一

十四

之各有斬獲開琳等進抵鴉坑列陣田壠後隊伏於栗樹街賀章彬督騎衝入賊陣手刃數賊奪馬四匹王開琳喻勝榮繼之往來盪決葉兆蘭率民團從旁抄擊賊大敗奔適我別軍將城安賊館埽除馳至助戰王開琳令鄧榮達率所部繞出蘆林橋扼其歸路而自督各營從後掩殺直追至琅田斬馘甚多日暮收隊卽駐城安黃嶺賊於是夜回竄石埭七都一路而去共計斃賊近千內有僞朝將陳矮子等賊生禽百餘內有僞主將鍾亞才崙天安劉永安等賊訊明戮之奪獲馬匹鎗礮旂幟無算我軍亦陣亡十一人受傷十八人祁北肅清劉

典王開琳王沐議出嶺會勦石太以掣賊勢忽報太平古賊來犯十六日竄橫潭十七日竄郭村其黨甚眾典令張聲恒聶邦光黃少春楊芳桂等各營進駐黟縣賊知有備改竄箬嶺二十一日至許村前隊已近潛口其行剽疾徽歙大震典令萬安街屯溪各營往勦並令都司劉敬廷先帶親兵乘夜馳赴潛口多然瞭火以張虛聲使賊疑忌不敢銳進一面邀皖南鎮總兵唐義訓率師來會比我軍抵潛口賊已遁出嶺外二十三日復竄至許村一帶並分股由績溪擾及歙東石門裏東鄉等處勢張甚二十四日唐義訓出隊至豐口以牽上下豐

之賊典令楊詠春張福齊劉大謨李耀南朱尊賢廖渭臣彭俊光楊在田李裔輝等分隊進搗許村賊巢自率親兵策應賊陣層列我軍奮擊賊已不支猶復扼橋力拒張福齊怒馬衝之斬其驍賊乃潰而奔斬馘五六百生禽二百餘解散脅從數千獲騾馬十五追至正村餘賊越嶺竄去禽賊言僞金王等賊謀仍由徽境竄入江西不能則竄昌化擾浙二十五日典移軍徽城次日黎明卽與唐義訓分道進勦橫村口石門裏藍田等處賊先一夕賊已竄回旌德老巢唐義訓追至孔靈劉典追至八都斬其尾賊而返偵知賊之大股由甯國分竄

廣德浙境石埭太平旌德各城尚有賊踞左公疏言賊意似在牽綴上游官軍使不得悉銳而東曾國藩現檄鮑超一軍由蕪湖進攻南陵涇縣等處檄江忠義席寶田李榕喻吉三朱品隆等軍由青陽池州進攻石埭太平旌德等處兵力甚厚如果嶺外肅清節節掃蕩而下則皖軍攻建平廣德扼東壩浙軍由昌化於潛孝豐臨安進規湖州兩路聲勢聯絡遙合長圍庶可保完善之區以制鴟張之寇至三年四月初二日賊果竄昌化白牛橋被官軍擊敗向甯國績溪竄去左公慮其仍循前路闖入腹地令黃少春分軍由上游徽境威坪街口等

處截剿賊於初七日折竄歙縣南境之建口在深渡下十里方欲造架浮橋適副將張福齊周紹濂游擊劉昌選等率隊由小川馳至副將唐連勝率礮船沿河而上水陸並擊賊不得渡卽在建口一帶屯踞初八日張福齊等督水陸各軍進剿賊傾巢出拒我軍力戰敗之共斃賊四五百生禽二百餘內訊有僞指揮吳年龍等賊誅之拔出難民數千奪獲騾馬四十餘僞印十餘追至績溪所屬之孔靈而還別股繞竄黟縣之八都葉村者亦爲徽軍所敗其僞聽王陳炳文僞康王汪海洋等賊前由皖浙竄入江西玉山縣境復欲由沙溪過河南竄

道員王德榜副將劉明珍馳扼之四月朔日賊從沙溪上下夜架三浮橋劉明珍令參將王本富游擊賴長張成元分段堵禦相持一時許我軍晁水過河奪其渡船十餘賊猶力拒明珍復令守備王益隆梁友武率死士數百於上流乘筏潛渡出賊後擊之賊始駭走掩殺三四百悉毀其浮橋賊向西竄去明珍恐賊直犯廣信乘夜疾趨比曉抵信城則賊之前隊已及靈溪距郡止二十里矣而賊自沙溪敗後見官軍馳援廣信分黨一枝折回渡河而南竄入廣豐邊境初三日午刻明珍率所部擊賊靈溪賊勢少卻賴長抄小路橫衝賊陣賊潰走

追十餘里中鎗墜溺者甚眾斬黃衣賊目四龍旂賊目二十餘白衣賊二三百而還王德榜一軍旋至初四日各率所部出廣豐洋口值賊隊大至數百騎衝鋒來犯明珍大呼陷陣我軍以火彈擊倒二三十賊短兵繼進賊殊死戰王德榜率各營夾擊斬黃旂賊數十賊敗走追斃千餘德榜以賊竄廣豐二十九都距縣城二十里復率所部窮追至青荆山前擊其後隊廣豐防軍亦疾馳迎勦又斬賊百餘是夜營於中塘埠初五日黎明再進賊潰遁我軍追斃數百獲馬五直至水門鎮收隊賊向鉛山竄去旋由南岸竄至上清宮一帶撫州戒嚴江

西軍繼果精捷兩營回援德榜令副將戴奉聘率三營扼貴溪自率所部進駐弋陽二十二日主簿劉廷選以礮船護運米糧軍火先發行抵黃沙港距弋陽二十餘里賊踞山設卡攔截矢石如雨德榜急令副將呂永貴游擊何秀清鍾元興等督率擡鎗小鎗各隊偪擊之賊乃走我水師亦擊沈賊船十餘左公疏言賊由皖浙邊境上竄其粵賊林彩新一股兩經浙軍剿截一經徽軍截剿漏逸無多尚不足爲江西之患惟由浙境竄江西一股現踞湖坊陳坊等處與皖境竄江西一股合併而前而竄入福建之賊又復回竄江西各賊麇聚一方深

爲可慮王開琳一軍現由廣信進屯興安與弋貴聲勢聯絡劉典新募之三千人計已行抵袁州臨江一帶臣令王德榜戴奉聘兩軍并歸劉典調度俟湖城賊蹤稍定仍當調渣遂防軍前赴江西爲其後繼也王德榜旣至弋陽偵知賊由德興海口竄來一股已抵鍾家畝距弋陽城三十五里謀先犯弋陽再從黃泥港渡河與先竄南岸之賊合股共犯撫建德榜令各營整隊以待二十三日賊奄至弋陽東北門外我軍憑城轟擊已斃多賊總兵蕭德龍副將呂永貴率隊出北門游擊何秀清都司李運龍率隊出東門德榜親督游擊鍾元興黎榮

鈞策應知府楊士樑率馬隊繼之江西師船亦沿河排
列賊見官軍齊進紛紛卻退德榜揮軍衝入陣禽冷天
燕鄭定懷泳天安張德福偽丞相吳得斌等戮之賊相
顧喪膽棄械狂奔追殺無算生禽百餘解散難民數千
獲馬五十五其傍河逃走者亦多斃於水師餘賊向湖
西一路竄去左公謂林彩新一股再經此次大創爲數
無幾殊易殲除惟此尚係常州竄出之頭隊其續竄數
股尚屯踞湖州安吉等處未動也五月初八九日王德
榜追勦汪海洋於大田畝汪三渡黃沙港連戰皆捷湖
坊陳坊肅清旋經幫辦江西皖南軍務劉典調赴臨江

德榜軍次貴溪偵知賊酋丁三洋欲由貴溪盛源洞竄
踞安仁鄧家埠一帶恐其沿河直下繞出我軍之前遂
率所部疾趨並約王開琳從貴溪渡河截勦比王德榜
於二十日馳抵安仁賊已踞鄧家埠羅田岡上等處距
縣城僅十五里二十二日德榜督軍進勦羅田岡上破
之適戴奉聘率所部與江西內河水師從上游並至賊
大潰追至張家灘收隊二十三日進勦鄧家埠賊已先
於夜間架浮橋逸去蕭德龍等追及賊正爭渡我軍感
之溺斃無算賊向東鄉逃竄值連日大雨溪水暴漲德
榜不能渡軍乃暫住鄧家埠對岸馬岡嶺六月初一日

過河行至梅村橋遇數百賊據糧回邀戮殆盡並將界牌村河村賊館廓清生禽賊首黃正魁斬之拔出難民數千左公疏言汪海洋一股現已悉數由許家灣下竄東鄉李世賢一股尚踞崇仁臣令王開琳一軍馳赴貴溪與王德榜相機渡河南剿必須肅清東鄉一路方可與劉典合軍臣相距較遠楊岳斌由水路起程此時計已入江嗣後王德榜王開琳兩軍攻戰情形應卽由楊岳斌沈葆楨奏報以免遲延會賊竄閩境復奏言臣維竄閩之賊僅林正揚花旗一起現已回竄江西意圖合併大股其近光澤建甯甯化各邊界時有賊蹤出没暫

尚未足爲害揆度賊情非經江西攻剿窮感必不能遽

竄閩境惟延建邵汀一帶盜賊素多急應誅鋤以靖內

患現在康國器之軍已抵邵郡臬司張運蘭亦由江西

取道信豐定遠以入汀州臣已飛檄各將邊腹土匪迅

速殲除確偵江西賊蹤相機兜剿張運蘭康國器久經

戰陣自知以剿爲防不至畫疆自守惟閩省關隘與江

西緊接者自光澤至武平延亘千餘里客兵越垣祇能

相機截剿不便久戍致滯戎機臣惟有與撫臣徐宗幹

慎以圖之迨八月間賊由湖州廣德甯國上竄各軍迭

次截剿著名賊目十殲八九浙省全境肅清惟僞嗣太

平王洪福瑱卽所稱洪幼逆也自金陵逸出沿途衝竄未獲死黨數千於二十五日向江西廣豐竄去適劉典一軍已抵貴溪黃少春劉明珍兩軍馳赴廣信河口一帶王開琳王德榜等亦率所部急追左公嚴令各軍無論賊竄江竄聞悉數殲除母任漏逸而十六日總兵劉明燈在歙南建口大捷生禽賊酋李士貴又於屯溪搜獲僞王宗蘇得萬僞神將周先發僞朝將熊國仁等李士貴籍隸湖北江夏咸豐二年被擄僞忠王李秀成收爲義子封僞職歷隨忠賊竄擾江浙擁眾二十餘萬本年三月率黨三萬由丹陽廣德竄入湖州茲復竄出眾

屢敗盡潰以護眷屬落後被禽解省左公訊明磔之湖州賊首黃文金先於七月杪在甯國縣七都被擡鎗洞穿右肋昇至昌化白牛橋氣絕賊葬之距橋十里水寧司地方姚姓宅旁墻根參將劉光明前往起獲徧身黃紅綢包裹殮以黃緞繡龍袍帽方靴枕元寶二口含金葉左右腕籠金鐲四頭面尚可辨認於是破裂其屍割首級馳送左公驗明梟示武林門外廣德賊首黃文英亦就禽戮二十六日王開琳劉明珍馳抵上饒鐵山及賊尾隊急擊之賊由小路趨鉛山劉明珍率所部繞出弋陽黃沙港截之王開琳簡勇八百乘夜追至上路嘔

分隊鳴鼓而進賊奪路奔至鉛山界天明見軍少列陣回拒俄而大隊馳至賊復潰竄是日其斃賊數百生禽數十二十七日賊竄鉛山楊村五都距河口二十餘里時提督黃少春道員王德榜已抵河口料賊必走湖坊陳坊二十八日黎明進軍湖坊賊方踞村屋見官軍猝來僞王宗譚賊等率眾乞降黃少春受之卽令回戈前驅擊賊時王德權蕭德龍及劉明珍各營由黃沙港馳出夾擊斃賊二千餘賊大敗我軍追近陳坊三面賊之賊拋棄馬匹軍械奔越山嶺而遁是夜王德榜復降僞王宗譚長元僞朝將龔賢德汪元貴等及其黨千餘二

十九日追過陳坊四十餘里賊之前隊已分二股一由茶山竄瀘溪境一由雲際關火燒關竄入閩疆黃少春等甫收隊而總兵劉明燈道員李耀南副將張福齊周紹濂游擊黃元吉劉昌選六營適至卽令由小路躡追而溫處道魏喻義亦率軍由玉山廣豐馳抵陳坊見賊入雲際關急從大路追及尾隊擊斃數十解散無算餘賊悉向福建光澤及江西新瀘邊界逸去左公疏言賊由皖浙邊界西竄眾尚二十餘萬經浙軍截剿窮追除禽斬解散投誠外闕入江西者不滿萬人復經王開琳黃少春等節節追剿其由茶山竄瀘溪者僅一二十人

均無器械劉典伏軍於貴溪北岸要其尾隊降之分別遣散新瀘一帶兵力厚集無虞漏網洪福瑱李遠繼等由山徑竄越閩境計止三四人所過不佳市鎮夜則然火照路散漫奔走勢極窮蹙臣前慮賊入閩已令康國器張運蘭預籌截勦浙軍轉戰數千里往來奔馳病者過半暫令休息弋陽河口之間黃少春原部一營三旂外所有克勇各營仍歸劉典統帶此次各軍將領兼程逐北備極艱劬擬請併入克復湖州安吉案內獎賚其前後陣亡之副將喻可宗參將張顯榮朱連彪都司張亮華守備左萬明金有成彭友年把總羅廣林等均

平浙紀略

卷十一

三

請優卹

旨俞之始左公軍發信州先清徽境而後入浙自河口廣信常玉山達衢州設轉運供征繕焉江西實爲大軍後路而饒廣一帶錯壤皖南門戶洞開無險可阻賊旣盤踞金陵視皖南如四達之衢日馳騁出沒於其間鶻落豨奔飄忽無常東備則西走尾擊則首應故其地繫江浙安危虛實緩急率爲所誤江西稍遠而游騎往來蹂躪郡縣殆徧浙疆最近受害尤酷左公力攻腹地頻克堅城賊狡悍俱竭師其故智牽綴多端左公以別將屬之劉典忠勇奮發將士輯和援皖援江縱橫數千里戰無

虛日始摧其銳繼伐其謀終且聚江浙逸出之眾雕勦
霆擊十不存一困獸游魂假息聞粵傳曰以此始者以
此終是以不旋踵而奏蕩平也

平浙紀略

卷十一

十四



平浙紀略卷十一

同治三年九月十五日奉

命督辦軍務閩浙總督兼署浙江巡撫左公既奏洪福瑱李遠繼等賊由鉛山竄入閩疆而李世賢汪海洋兩股屢被官軍勦敗賊黨尙眾時出入江粵邊界按察使張運蘭總兵關鎮國擊退瑞金踞賊後賊之入粵者復由大埔竄犯汀屬武平縣境張運蘭分軍駐守縣城自率隊馳援扼紫下赤屢戰皆捷九月十一日賊抄徑路襲破永平知縣沈玉田死之張運蘭還救以兵少陷伏中矛落馬賊擁入城罵不絕口十四日被賊總兵賀國琛王

平浙紀略

卷十二

一

明高副將雷照雄以下二十人皆死賊卽分陷龍巖南靖土匪游勇內應遂於九月十四日竄陷漳州閩撫徐公宗幹調泉厦各軍六七千人分防興泉兵力甚單左公以漳龍失陷汀州亦徧地賊氛北與延平永春毘連南與廣東潮嘉接壤江西瑞金會昌尙有賊踞康國器駐邵武關鎮國駐汀州均未可動乃檄提督黃少春副將劉明燈兩軍四千五百人由衢州取道浦城赴建甯以趨延平爲中路軍令援江各軍幫辦軍務劉典所部八千人取道建昌趨汀州爲西路軍記名按察使王德榜率二千五百人繼之又以此兩路山徑險仄恐帶戎

機復令提督高連陞率軍四千五百馳赴甯波乘輪船
由海道直趨福建省城出興泉爲東路軍左公部署已
定遂於十月二十八日啟行十一月十六日次浦城謀
知漳州龍巖南靖永定平和雲霄各城賊勢愈熾署陸
路提督林文察於十一月初三日敗死漳州曾玉明水
軍亦多死傷退守江東橋其時高連陞已由福州前進
初七日行抵泉州劉典黃少春及署按察使王德榜各
軍先後至閩左公亦於二十七日進駐延平賊氛連延
數百里並由龍巖散布連城上杭甯洋各界道員張恆
祥率張運蘭舊部一擊挫之康國器由永安雁石進勦

平浙紀略

卷十二

二

十二月初二日知府康熊飛等率各營進屯鐵石洋距
龍巖城八里賊來撲營力戰却之連日皆捷二十三
日賊又至日戰數合喪其精銳千餘而遁會賊丁太洋
由永定出漳平之永福里以撲縣城朝天嶺守將陳允
彩軍潰熊應烈退保漳平適左公所調游擊賴長亦至
自甯洋相與登陴掩旗設伏大破之賊卽退還當是時
劉典由連城進駐朋口聞漳平被圍乃令護汀漳龍道
趙均馳援自率各營進屯楊家坊以攻南陽新泉十七
日分勦下車上下羅等處賊卡破之十九日令總兵楊
芳桂道員李耀南副將張福齊參將劉大謨等攻破馬

洋洞賊壘大謨恃勇深入賊四面包抄副將盧華勝參將劉廷敬陣亡劉典聞敗往援行半里卽與賊遇接戰而別股已抄出軍後游擊郭立本戰死賊遂乘勢撲陷楊家坊營盤知縣夏世楷州判姜景焜從九品蕭子麟生員謝封龍鴻賓監生沈超文童黎斗城等俱遇害二十日典收集各營退保連城已而趙均擊解漳平之圍王德榜王開琳先後抵汀州疾趨連城二十八日德榜進攻莒谿典遣軍攻朋口俱克時護浙江巡撫蔣益澧檄署衢州鎮總兵劉清亮率湘軍三千移駐浦城聽左公調遣又合游擊張政順洪楨祥赴甯波募花綠勇千

人訓練以備緩急十二月初十日我軍進駐莒谿朋口十二日復乘夜襲破下車南嶺賊巢高連陞聞同安土匪謀應賊於十一月初十日由泉州馳往撫定卽進屯萬松嶺瑞香亭扼漳州東路黃少春亦由同安馳抵江東橋於十二月初四日進屯北谿扼漳州東北十五日城賊大股夤夜撲至莒谿之西少春連陞夾擊敗之初降將劉得義邱萬勝稱李世賢部黨僞天將李魁元有眾數萬投誠少春以未審情僞不許二人計沮遂約賊乘夜撲營斫傷參將周雲遠游擊黃元吉而叛少春聞變率各營還捕追至崎下橋叛卒多散禽獲賊目劉隆

章余萬年陳金元及其黨數十誅之得逃入城者三百餘賊而已十七日賊復傾巢分四路來撲擊敗之十九日賊陷長泰游擊龍順友戰死二十一日少春等進攻破之賊夜遁左公疏言東南遺賊全數竄閩分爲四大股李世賢踞漳州其黨僞來王奏王各賊踞龍巖永定南靖雲霄等處眾約十餘萬汪海洋踞長汀連城上杭三界之南陽鄉分爲一百八十五隊每隊五百合計賊九萬有奇丁太洋林正揚則出沒漳龍間眾各數萬而粵之潮嘉閩之泉漳汀龍永春等府州向稱盜藪從亂者更不可勝計賊雖殘敗之餘皆遭誅劇寇廣東江西

邊防愈固則賊之竄閩愈深將欲聚而殲旃非厚集兵力不可現在主客各軍之可恃者不足三萬臣親兵各營亦止三千人以之分布數百里且防且勦實形不足如欲廣爲徵調則籌餉倍難惟就現在兵力多方激勵以收餉節兵精之效汪海洋分黨復踞下車南嶺馬洋洞及古田涂坊一帶阻我進攻之路劉典抽軍駐文坊令王開琳張恆祥進屯汀南四十里河田以規南陽十二月二十六日開琳等進勦涂坊破壞其巢並敗賴坊援賊其斃千餘陣斬賊炳天義李斗箕欽天豫洪世芳

二十九日汀州鎮道遣守備李仰山率隊知縣張行楷

集團會粵軍攻克永定縣城四年正月初七日開琳率軍及王文瑞所部新湘九營進駐涂坊劉典亦令李耀南張福齊進屯楊家坊張恆祥進屯塘背王德榜屯拒廟前長圍漸合十一夜王德榜等進破下車賊巢陣斬僞王宗汪運勝等賊十二夜張恆祥遣隊攻破南嶺賊卡漳州之軍自去臘克長泰後分營移屯郭坑對岸賊來犯高連陞督洋鎗隊四百敗之追至河邊而浦東渡南數萬賊大至黃少春亦率馬步精銳百餘夾擊賊乃退連陞偵知李世賢欲嗾汪海洋守龍巖而調龍巖之賊會丁太洋林正揚等犯安谿調永定賊由坎下入漳

分漳賊犯長泰併擾泉州斷我軍餉道以窺省城乃分軍駐長泰復召民團憑河而守王德榜旣扼廟前阻汪海洋赴龍巖之路賊謀中沮而龍巖賊勢亦孤正月二十三曰分五路撲鐵石洋康國器督各營力戰敗之二十四日復擊退古田援賊萬餘是夜乘勝攻城賊不能支敗南門逃去遂克龍巖畱軍守之仍率各營追剿左公令劉明珍率所部由白沙總兵劉端冕副將馬駿發由永安甯洋漳平均出華封司以厚漳州東北兵力而斷賊內竄安谿之路爲長泰守軍聲援復調浦城劉清亮所部三千人由福州出興化趨泉州同安以固高連

陸黃少春後路會正月二十三、四、五日劉典令張福齊楊芳桂等出馬洋洞右及新泉下車連破賊卡數十直抵南陽誘汪賊出戰敗之斬首數百級王德榜截剿古田擄糧賊於蛟洋從馬洋洞開道出禾樹凹破賊六壘並敗南陽援賊斬其僞王宗汪海林攻破古田賊巢追至小池復破之共斃賊二千餘王開琳敗賊於羅源嶺僞天將胡瞎子率黨萬餘來援又破之復分軍敗賊楠木嶺及茶樹下生禽僞天將孫學保張鴻順等三十四賊誅之張恆祥破賊於香塔白雲嶺井贅坑各路皆捷

二十七日典令李耀南張福齊扼紮新泉王德榜進次

馬洋洞汪海洋率黨湧至我軍且戰且退至新泉壘邊賊分兩大枝來撲劉大謨劉春藻等由下羅赴援典亦率親兵馳至諸將奮勇搏戰賊敗踞山邊汪海洋揮之還鬪官軍陣動典亟傳令斬退者應戰十餘合賊梟水逃竄西岸溺斃甚眾我軍追至下車幾獲汪海洋共斃賊五、六千生禽四百陣斬僞天將陳李等賊禽賊言海洋選諸悍賊被以黃白號衣名標旂手厚待之事急輒麾令向前自謂無敵至是喪失過半爲之奪氣劉明珍趙均先聞龍巖旣克卽由漳平進扼永福里偵知敗賊未遠而丁太洋橫踞水潮和谿一帶是日率黃本富張

成元等進勦誘擊和谿賊敗之夜復襲破三卡正月二十日李世賢復犯漳浦二十一日陷之高連陞等分軍馳駐海澄石碼二十七日黃少春出隊破賊於漳郡河邊二十九日連陞復破之三十日賊攻陷曾玉明丹洲陸營直趨鎮門師船俱潰連陞率隊馳援賊退走我軍渡河追殺賊折奔丹洲爲蕭立信等所扼復赴小港梟水欲遁又被劈山礮轟截各營乘勢蹙之生禽三百內有侍賊僞參府元勛等百四十餘賊悉戮之我軍亦陣亾副將哈必發守備王福泰時曾玉明所部臺勇從險橋馳至民團爭出殺賊芟夷略盡禽賊言李世賢率黨

數千欲從鎮門攻取石碼以絕官軍餉道蹶敗至此二月初三日劉典慮汪海洋他竄令楊芳桂李運勝等赴中村截之初四夜賊果棄南陽走初五日楊芳桂等追擊於上杭之舊縣粵軍邀擊於石腳下皆勝典復慮賊內竄令李耀南等於初六日進駐華家亭適賊竄踞白沙張福齊等追及與耀南夾擊敗之初七日典會王德榜進勦白沙賊悉銳拒戰把總康德修軍功郭慶雲陷陣死軍少卻會王德榜及康國器所遣羅洪標等兩路馳援賊乃大潰追殺十餘里禽斬數千王開琳聞南陽賊竄亦追敗之茶樹下並破兩壘賊且戰且退初六日

竄永定之坎市復竄龜陽汀連肅清是月初三日劉明珍遣岳炳榮黃本富等由永福里攻破板場後壩賊卡初四日和谿水潮賊合黨來撲敗之我軍乘虛繞襲和谿守備梁友武先登遂平其巢初五日進攻水潮丁太洋棄壘遁其斃賊千餘會汪海洋退竄南靖永定兩界之奎洋苦竹梅林場校施洋山城金豐等處李世賢於漳州東北浦南金沙烏頭門社一帶加築城壘劉清亮由同安抵江東橋見賊勢趨重漳北遂進屯北谿黃少春進屯北尾橋高連陞進屯好景山二十五日少春復合周紹濂等移屯翰林洲僞天將譚賊由樓內寨來撲

少春援破之二十六七日均有斬獲三月初二日漳州城賊萬餘分路來犯少春連陞等各擊敗之初七日連陞進屯響水橋初九日復率丁賢發錢貴仁等過河築壘僞之少春設伏北尾橋河邊與連陞向東關而進各門城壘賊分來抄撲連陞少春自扼東路分麾諸將迎戰皆破走十三日賊五六萬眾復出連陞督知府魏光炳等力戰破之李世賢嗾僞天將李學金驅敗賊回關內有洋人十餘擎洋鎗突前傷我戰馬數匹官軍馳斬二洋人少春擊賊馬傷卽躍下持矛督戰賊敗遁追至東關而還共斃賊二千餘官軍亦傷亾百餘人十四日

復大破之十六日連陞令朱體盛屯扼赤嶺南部院祠
世賢復糾合南靖賊共十餘萬並用開花礮出戰時蘇
撫李公鴻章遣提督郭松林率所部十營航海來漳與
高連陞合軍踰赤嶺黃少春軍踰北尾橋分路迎擊福
州稅務司美里登亦由廈門海澄攜帶開花礮助剿各
軍齊進呼聲震地郭松林督小隊直搗中堅羣賊辟易
官軍急擊勢如風雨賊大敗入城其別股由樓內窺突
出雷岡山者俱被劉端冕等擊退計殺賊三四千而王
德榜由龍巖馳赴漳北華封見賊聚豐山對岸金沙一
帶乃留軍駐豐山自率各營進屯潭口與劉清亮渡東

谿環之軍相應十四十五日擊破吳倉烏頭及對岸數
賊壘劉典亦由龍巖進駐城南六十里遣軍分屯上坪
水尾邊村東偵知汪海洋踞所連亙數十里而奎洋尤
爲通南靖漳州大路十五日遣張福齋周顯民徐萬福
等各由白石凹上下與進軍典自率楊芳桂齊蘭禮等
出嶺頭遇賊皆有斬獲行至奎洋山巔賊來撲敗之擊
破下奎洋梅林賊援並斃賊千餘十六日王開琳由永
定分所部八營屯扼距城三十里湖雷鄉賊黨萬餘分
路來犯迎剿至跌馬寨敗之追至岐嶺設伏而後進殲
其援賊追及復大破之共斃賊二千餘生禽僞佐將譚

如春僞指揮周正南等七十餘賊我軍亦陣亾游擊黃柳谿都司李文質陳道政守備羅福清等左公疏言賊汪海洋踞龍巖永定南靖三界之奎洋等處與李世賢相爲首尾其地可由永定武平竄江西廣東亦可由平和竄廣東李世賢黨分踞雲霄平和丁太洋復陷詔安其地緊連廣東潮嘉濱海之區素多盜艇出沒汪賊志在竄江李賊志在入海現被閩軍急攻則賊必以粵東爲退步徐圖遂其竄江入海之謀防賊入海以潮屬之汕頭詔安之銅山腔口爲要而目前形勢則銅山腔口尤急前已調蕭端芳六紅單船駛赴腔口仍催水師提

督吳全美所雇紅單拖督船各二十迅赴銅山並令曾憲德鄧廷枏就近派撥師船先往防守至扼賊入粵之路衝要惟饒平大埔粵軍防邊尙密方耀一軍亦已調回兵力似不爲薄閩軍中隔賊氛實無餘力繞越兼顧臣現籌王開琳康國器及關鎮國所部各軍共一萬二三千人嚴防永定湖雷撫谿一帶足以遏賊奔衝婁雲慶一軍萬餘近始由江西赴武平距粵咫尺似可移緩就急爲江西助粵之軍庶粵東固而由粵竄江之路亦可無虞汪海洋於十七日潛赴漳郡二十三日仍回粵

校自二十至二十七日康國器督軍由龍巖分路進剿

更番迭戰力破茅畚礮下各壘並擊敗苦竹梅林場校
援賊劉典督各軍分路進攻奎洋先破嶺巔賊壘我軍
傷亾數十乘勝破平下奎洋壘卡及中奎洋賊館汪海
洋從梅林場校來援亦破之共禽斬六千殺其僞天將
翟玉山陳光明等賊十三十六十八日漳州之賊屢撲
劉清亮王德榜營壘均擊退二十四日我軍兩營渡河
賊來撲尤猛德榜親督洋鎗隊力戰破之共斃賊千餘
官軍亦多受傷二十七日王開琳督軍進剿苦竹馬傷
復易已破數壘忽援賊大至亟收隊參將文任重戰死
各軍陣亾游擊鍾元興以下十三人四月初十日康國

器令康熊飛羅洪標等擊敗賊於巖前十一日奎洋賊
竄至大谿十二日黎明乘霧迎剿敗之副將吳光亮等
由東安進薄苦竹並分屯苦通礮下偏之參將林福喜
等夜襲賊破其八營及附近各壘汪海洋由大谿來援
康熊飛等遇於東坑破之進破湖坑大谿賊壘直追至
大埔所轄之三角塘太平寨始還其禽斬二千餘拔出
難民數千苦竹旣克漳州賊勢益孤蘇軍提督楊鼎勳
由廈門至海澄後卽與郭松林議扼通漳浦之路初十
日松林率八營進屯城南十里古縣東山前一帶鼎勳
接駐鎮門城賊數萬由下古縣浦西社來撲松林分軍

迎勦敗之別股繞出恆倉社鼎勦令提督黃中元出古
縣之前截其歸路總兵周河清舒義志王萬釗高占魁
副將張遵道朱興榮等往來奮擊高連陞黃少春亦各
出隊過河策應賊始奪路而奔王德榜偵知南靖賊分
竄汰內恐其繞犯安谿乃令戴清輝等分屯貫口黃棗
是月初六日貫口軍擊破汰內賊二千餘賊退回南靖
初十夜吳倉烏頭門之賊潛撲河西李運勝等營十一
十二日賊復悉銳來犯德榜命李運勝聘李金信等過河
夾擊皆破之斃賊千餘我軍亦傷多人十五日王德榜
劉清亮合攻烏頭門從浦南沿河直指其巢賊傾巢而

出各路援賊亦集我軍鏖戰自未至戌適賊中火藥轟
發乃驚潰其斃二千餘賊我軍亦陣亡百餘人李世賢
復謀句結同安土匪內訌郭松際松際隊會道員曾憲德
將西塘上宅澣井各鄉巢穴掃蕩並令在籍知府葉文
瀾縱火焚其停泊海船百餘左公以東北一路兵力尙
單令新授福甯鎮總兵劉明燈五營由延平馳赴安溪
華封一帶防勦二十日王德榜等復進攻烏頭門未克
高連陞黃少春謂烏頭門與樓內寨犄角不拔其一則
漳州終不可復遂於二十一日會郭松林楊鼎勦王德
榜劉清亮進軍分截南靖援賊並扼北尾橋以牽樓內

寨賊勢環攻兩時連陞部將何世載先破一壘各營連克賊壘十四殺賊萬餘生禽三四千拔出難民數千追奔至天寶寨距南靖十里賊望風走魏光邴馬駿發等見烏頭門賊寨煙起率隊螳附而登斬其斷後賊二百餘躡抵東關乘勝攻賊附城十餘壘北尾橋一帶民團亦吶喊助勢時風雨大作連陞等馳至督放噴筒火箭東風愈烈各壘並然遂奪門而入提督曾玉明亦率臺勇攻克石亭賊卡由南門殺入李世賢巷戰踰時乃率死黨從西門逃去是夜亥刻克復漳州清亮德榜各邀斬賊數千時劉典方攻南靖十九日李耀南等攻破緘

口塞五壘並擊敗南靖上社小溪山城援賊禽斬二千二十二日進攻縣城王德榜追賊適至城壘各賊震駭俱奔遂克復南靖收降四千人其餘追斬略盡左公以漳州閩省腹地菁華聚積一經賊踞全局震動洋人之通賊者又從中接濟其勢更張自攻勦以來戰無虛日賴諸將和衷共濟並克堅城疏上其功並請優卹陣亡參將鄭金麟都司張大勝千總張得勝把總李金信等詔俞之王德榜由南靖追勦敗賊二十三日至羊城大捷又敗之林浦共斃賊五千餘賊竄平和二十五日高連陞

黃少春劉清亮等追及於馬鞍山五鳳山下再破之斃

賊七八千二十六日追斃千餘二十七日攻破磁洋賊壘殲之並進克楚礮安下賊巢李世賢率黨數萬來援殊死戰我軍繞擊其後賊陣始動世賢雖連斫數賊不能止其奔逸也追至平和賊繞城而走城賊亦急開西門狂竄遂克之進追敗賊前阻嶺港賊死甚眾世賢連馬墜橋下負創而遁又追二十餘里至大埔所轄赤石收隊共斃賊萬餘生禽三千餘而郭松林楊鼎勳軍自克漳郡後卽進屯長橋二十三二十四日連破賊於博孝嶺水磨嶺南坑尾坑等處二十五日令提督易用剛總兵李長樂宋德鴻曹仁美謝連陞副將洪寶林王德

駿郭文武黃中元等圍攻漳浦盡掃附城各壘二十六日擊退賊轟攻至夜賊於三更由南門竄走丑刻克復縣城雲霄賊益震懼於二十七夜縱火由西南門竄向平和次日吳鴻源收復廳城初雲霄岳坑文生朱得時通賊至此郭松林等並平其巢高連陞等由平和追賊四十里聞雲霄漳浦敗賊竄至二十九日向大谿迎勦民團截之生禽僞天將陳有才胡艾森並斷僞祥王黃隆芸左臂獲之護從賊目悉被禽戮降斃各數千降賊言守漳浦之僞凜王劉肇鈞危迫白盡守雲霄之僞列王朱義得亦被陣斬其僞利王朱賊僞來王陸賊兩

股是日王德榜追至大埔縣境粵軍截之賊斃無算德榜受降四千餘內有僞天將郭楊維等五賊僞神將朝將何華炳艾孫武等六賊僞總檢同檢提點徐添寶等三賊僞天義天豫天安朱大寶等六賊僞編修馮祥雲功醫蔣永瑞共賊目二十四及驍黨百五十四悉誅之收軍還駐平和郭松林等遣軍進攻詔安亦於是日破之梅村五月初一日收復縣城丁太洋率眾向烏山竄走初五日至白土王德榜勒軍追擊禽斬四千餘賊由間道竄下洋苦竹繞越龍潭乘虛撲坎市行營劉典亟調各營夾擊大破之賊走高陂橋我軍扼之太陽壩丁

太洋路窮乞降繳僞印四百餘典受之令選畱千人隨軍效力餘悉薙髮給資遣歸汪海洋一股自大埔回竄永定王開琳遣軍拒之四月二十日攻陷我湘營於獵射凹總兵丁長勝游擊陳觀光等死之賊遂進圍縣城二十三日延建邵道康國器馳抵湖雷二十四日毀賊羅灘浮橋二十五日汪海洋糾僞佑王黃賊僞裕王周賊僞列王羅賊僞天將翟火姑等分七路撲營國器督諸將吳光亮林本羅洪標賴長關鎮邦等力戰破之二十六日賊復悉銳來撲又破之賊越嶺而走先後禽斬六千餘賊二十七日進剿至劍灘賊望風潰是夜向永

定西北一路竄走時劉典復遣李耀南張福齊等往助劉明珍亦自撫谿馳至二十八日與國器合軍追殺獲其輜重偽陪王譚賊偽天將林賊一股續竄劔灘各軍截擊禽斬殆盡典回軍坎市令張福齊等駐湖雷李世賢續敗至永定三十日偽來王陸順德偽王宗李元茂等賊眾爲谿漲所阻五月初二日康熊飛追至塔下賊猶力戰守備劉振伍陣亡我軍突出賊背敗之遂破三浮橋禽斬淹斃及棄械乞降各萬餘偽天將潘起亮曾洋貴陸連福偽朝將劉貴福鄧雲貴等皆死初三日張福齊朱定元等別追賊大隊於獵射凹轉戰至永定河

邊扼其西渡陣斬偽王宗李賊及既降復叛之賊劉得義共斃賊四五千降其後隊萬餘偽天將神將何春貴等率黨二萬四千亦降於王開琳軍前五月初十日十二日高連陞等追賊至大姑灘連敗之十五日破賊浮橋與汪海洋大戰三時並敗其援賊十七日過河窮追賊竄武平縣境十九日我軍急馳至武平二十日擊走車刃之賊二十一日進剿中赤巖前而賊已折回下壩仍向粵東邊界竄去連陞等進駐下壩共斃賊三四千閩省肅清時丁太洋已降李世賢林振揚兩股禽斬殆盡而林振揚旋縛偽來王陸順德降於粵軍惟汪海洋

一股竄粵五月十八日賊前隊陷鎮平粵軍擊卻之俄而失利二十二日鎮平復陷擾及平遠分黨回竄巖前上赤二十九日我軍進擊破之遂分扼中赤巖前下壩閩五月二十日出隊擊破分水坳口賊卡康國器先進軍嘉應之松源欲規鎮平會賊之踞龍虎墟者偽利王朱興隆偽稽王吳玉堂乞降國器遣人約爲內應他賊覺之朱興隆等遂走投鄧安邦粵軍國器於十五日改道三谿口進剿擊退藍田之賊會汪海洋攻陷石峰徑兩營粵軍退守嘉應而霆字營叛卒由湖南江西廣東邊界竄至興甯與之合併賊燄復張國器由龍牙進兵

連敗賊於嵩山瓦窰並破白渡新鋪墟賊壘六月初三初四初五日賊潛入閩邊廣福鄉刈稻高連陞黃少春等擊走之初六日海洋大舉出分水坳分撲巖前豬股坳營卡血戰數時殺其偽總統護朝將伍金保賊猶短兵搏刺良久兩路皆敗乃遁初八日賊復傾巢而至裹兩日糧以期致死我軍堅壁待之賊撲近輒排礮一轟相持至未申間度賊氣衰各鳴鼓揚旗突出賊卽駭奔遁還鎮平連日禽斬數千而將士傷亾亦三百餘副將湯復春通判龍朝翼游擊黃春田及王朝先袁金榜何亨全等均陣亾六月初九日康國器遣軍攻破海棠亭

賊卡偽陪王譚富偽朝將莫恩皆降二十七日國器由
高思前進七月初二日分軍進屯程官埠初六日攻破
藍坊石坑排南坑頭各賊壘初八日進至南坑頭賊胡
瞎子率黨三萬餘結陣山巔仰攻未克前約降之偽天
將李積曾務鄧伯才嚴進恆偽朝將陸鵬鄧成李香鄧
金麥祖等四千餘人焚壘衝出賊驚潰追殺至鎮平南
門外八里收隊三十四日汪海洋連撲程官埠高思
營壘其鋒甚銳我軍力戰破之生擒偽神將祝雲偽先
鋒游竹潘得壽游諸生陣斬偽王宗汪大力偽神將朱
三元等賊並擊傷海洋左腕數戰共擒斬賊六千餘我

軍亦陣亡把總區昌並傷亡三百四十餘人二十四二
十五日高連陞黃少春等進屯廣福鄉羅岡賊於城東
北路亭下築壘開濠嶺路屈折峻削仄不容趾旁徑如
梳勢險守固八月初一日我軍進營分水坳外初二日
汪海洋來撲新壘迎擊破之殺賊三千餘我軍亦傷百
餘人初七初八日連陞等進攻白泥湖賊壘而康國器
先於七月三十日進擊石古排並敗九曲峯援賊降其
偽天將張祥順周建榜等千餘人時粵軍已克龍川長
壽西南之圍亦合至初九夜攻破石古排守備李如陣
亡賊各壘皆潰國器乘勝進攻縣城汪海洋率黨從西

門逃竄連陞等亦從白泥湖追至衝殺入城殲其餘賊
初十日黎明克復鎮平汪海洋等賊分由梅子畚大寨
東石並向平遠而遁少春等追破之東桃鄉江西席寶
田軍破之東石賊折回大柘竄走自十一十二至十六
十九日諸軍連破賊於竹子澳茅樓坪河頭石正楓葉
坑甯興屬之黃陂墟羅浮司長甯屬之小山墟等處共
斃賊一萬數千降五千餘解散無數二十一日王開琳
從長甯鷲公墟進敗賊於瓊田二十二日進破嶺路及
烏鴉寨賊卡並敗小山墟援賊禽斬數千賊間道遁入
龍南縣境時高連陞康國器兩軍窮追六晝夜至黃陂

墟爲土匪所給深入伏中輜重軍火多失參將王德盛
以下李鳳翔關鎮邦周興義於長林王汝洪李恆王興
寶朱傳孝李光斗胡得貴梁材康達本李起生吳世欽
等死之一二日間賊已遠颺遂成尾追之勢左公所謂
譬猶捕鹿有其犄之無與角之終必絕塵而奔也二十
五二十六日賊竄定南信豐兩界小江墟一帶爲江西
軍擊敗復竄廣東連平境上下坪擾及龍南始興邊界
以我軍嚴扼各路遂由連平翻山繞平和興甯各境疾
趨十月二十一日徑陷嘉應州游擊英秀死之閩防復

棘左公令王德榜賴長林珠等分扼武平永定平和之

衝而自率親兵及新右營出屯瑄谿以固漳州南靖門戶調劉典黃少春及浙江提督鮑超軍入閩布置甫定高連陞等已尾賊由興甯東北趨嘉應時粵軍方耀鄧安邦軍藍口賴長軍井塘與西洋白官市粵軍何雲章容朝章等三營夾河而守旣而康國器由鎮平進屯烏泥坪高連陞劉清亮進屯漳樹坪各距城二三十里黃少春楊和貴朱明亮先在大埔左公率親兵繼進十一月十六夜方耀軍挫二十一日白官市粵營敗潰容朝章陣亡何雲章退至丙村二十四日劉清亮進屯鳳寨高連陞出隊翼之汪海洋傾巢來犯兩軍分禦血戰四

時之久賊由雙板橋遁去斬獲甚多我軍亦陣亡知縣汪遇元縣丞晏際時游擊朱體盛鍾敏遂都司錢貴仁王連斌趙玉林何文祿守備蕭煥武鍾洪霖千總鍾成魁等左公飛檄朱明亮馳赴三河壩以扼賊犯潮州之路二十九日左公次大埔劉典亦來自永定卽令其前隊進屯丙村並檄黃少春王德榜於十二月初二初三日由松口繼進德榜向塔子畧扼正東佛子高一路與井塘丙村之營相接少春向金谷坑扼東北葵嶺一路與樟樹坪之營相接而塔子畧與金谷坑樟樹坪與烏泥坪又互相聯絡復令總兵鄭紹忠粵軍六千屯長沙

墟以扼西南一面並檄惠潮嘉道張銑調礮船數十艘
駛赴三河壩以遏梅江通汀潮水路與朱明亮陸營相
爲犄角賊狃於數脫險不復以絕地爲慮見我軍漸次
進紮乃謀於州東佛子高分水鄉曹塘設伏以待初十
日少春德榜分屯橫徑深坑石灰窰一帶十二日五鼓
復自率數營進屯塔子舉劉典遣張福齊李耀南及高
連陞劉清亮康國器各率隊前往策應並分伏蔡嶺左
右是日黎明賊從左側衝出少春等率親兵擊退其前
隊已由曹塘潛抄深坑橫徑別一支由雙板橋潛經蔡
嶺均欲繞截我軍之後又出黃坑一支牽制井塘丙村

各軍俄而汪海洋胡瞎子各率黨數萬由佛子高黃竹
洋來撲漫山徧野勢極披猖我軍左右設伏自辰至未
戰數十合斃賊已二三千瞥見指湖頂有伏賊丁太洋
率所部馳上敗之會築壘已成我軍皆出隊夾攻將士
舍騎步戰呼聲動地無不以一當百橫徑深坑各營亦
齊出奮擊少春德榜復率親兵緣厓橫出截之賊敗走
直追至佛子高收隊還視戰處賊尸枕藉血漬谿徑谿
水盡赤我軍亦陣亡副將以下陽命伸趙輝光宋成祥
周壽臣歐隆盛施輝林章海輝蔡文蔚蔡名吉等其出
雙板橋黃坑之賊亦皆敗潰戰前數日劉典預與各軍

統領營官審度數十里內地勢規畫兵形瞭如指掌賊是以甚敗汪海洋顛中鎗子穿出眉際墜馬昇回而絕先是李世賢鎮門之敗我軍已獲其馬顏厝前民顏魁以破舟載之還漳及敗於永定未知下落六月二十八日潛逃至鎮平汪海洋郊迎並馬入城世賢以汪賊藉詞不救又殺其僞王宗李元茂等意殊不平海洋亦不自安遂於七月初三日遣人刺殺世賢及其黨五鎮平克後乃得其詳至是海洋亦斃海洋驍銳殆冠其曹我軍當之者必血戰而後勝世賢狡悍亞之縱橫江皖荼毒浙閩比於諸賊獨爲後凶乃或假手儕偶或殞軀礮

石敦謂天網疏而可漏哉汪海洋旣死賊情惶擾乞降者日數至其黨復推僞偕王譚體元爲首左公謂必四面合圍誅其桀悍宥其脅從勦撫兼施乃可蕝事於是

由松口前進令諸將連營環偪十七日鮑超一軍行抵州城西北相公亭十八日劉明燈簡桂林李耀南進軍西洋市十九二十日賴長進軍龍津橋鮑超進軍平城鋪山子下高連陞黃少春王德榜進軍黃竹洋佛子高曹塘一帶朱明亮進駐井塘以固各營後路並令各軍於西洋市架浮橋夾河齊進廣東布政使李福泰亦進至州西藍口遣方耀鄧安邦列隊古塘坪與鮑超犄角

十九日賊出七樹徑直撲粵營擊敗之二十日出隊相度營地賊來撲追遣提督唐仁廉李文益譚勝達總兵婁雲慶曾成武段福副將龔占鰲羅運昌等奮擊大破之禽斬無算我軍亦陣亡守備以下鍾福春章邦俊余勝才蕭大春方惠林王興志及軍功王錫紳等三十人左公察賊情勢將竄欲令閩軍迤而東粵軍迤而西以遏南路之衝二十一日張福齊進軍黃坑芹菜洋之閒左公亦率親兵前進二十二日粵軍曾敏行鄭紹忠由羅衣堡進屯州西南長沙墟迤屯州南小密方耀鄧安邦迤屯西南大乍堡三門坳進徧州南爲之策應

江軍席寶田劉勝祥由大坪迤屯州西方合鎖圍是夜二更賊卽啟西南門由小密出黃砂嶂而遁胡瞎子開路諸賊酋爲殿劉明燈偵知之而賊目沈文有等亦先輸款於黃少春並飛報各軍黃砂嶂者州南險隘羣峰峭削一徑盤紆爲嘉應出新田大田右至豐順左至潮州間道賊以數萬眾冒死出險急不得前劉明燈賴長簡桂林率所部馳抵泮坑斬尾賊數百追過小密鄭紹忠營各相混戰天明別識始向黃砂漳併追禽斬三千黃少春劉清亮四鼓聞報卽率隊馳入東門追出南門僞佐將劉廷貴以三壘降劉典亦降千餘賊及鮑超高

連陞王德榜康國器黃少春方耀等軍各追至黃砂嶂以徑仄陸續前進劉明燈等緣崖驅殺勢如拉朽禽斬解散又各數千獲馬五百餘高連陞劉清亮踵至追抵分水坳明燈等收隊鮑超前軍又至二十三日黎明連陞等及賊於大田掩殺二十餘里降其黨萬餘收斬霆營叛卒頭目歐陽輝及賊酋賴裕新賊猶越嶺狂竄又搜殺二千餘胡瞎子衣黃擁賊千餘匿長崑山畧密林中丁賢發禽之餘賊悉降追至嶺脊遇粵軍詢無賊蹤乃還是夜王德榜由黃砂嶂左追及賊於北谿四圍皆山我軍扼路登高呼曰降者棄械僞先鋒詹天義曹玉

科鈞天義楊世如會天福何至清僞天將彭大貴神將馬有玉等率眾跪求免死受降約四萬是日鮑超所部唐仁廉等亦追及何明亮黃矮子各賊酋於北谿沙壩大破之各軍乘夜躡追仁廉率洋鎗隊八營疾由兩崖小徑繞出賊前二十四日黎明賊猶奪路奔突鮑超親率駐城十營追至復分隊抄前爲仁廉後應洋鎗排列環擊各營從後衝殺截賊數段共斃賊七八千賊見圍合路絕始羅拜求生超將二萬餘賊悉數兜禽訊明僞天將何明亮僞佐將何明輝戴禮煌蕭秋林僞朝將黃壽發僞先鋒鍾有誠黃正元劉明盛嶒天義吳慶寶袁

天義袁戴春奮天安廖大順祈天安楊文魁隕天安陳
世路意天豫鍾意興段天福巫得盛僞衛國侯龍大賓
及叛勇頭目黃矮子等俱磔誅僞侯丁德泰等大小頭
目七百三十有匹並斬之而康國器軍亦於二十三日
由黃砂嶂右追剿至豐順縣北白水寨一帶禽斬無算
內有賊渠洪秀全堵僞金玉鍾英僞幼陪王譚標僞懷
王周春姪周祉福僞朝將黃松僞佐將何昌勝黃蘇寶
均解左公行營正法並訊明胡瞎子卽胡永祥磔之鮑
超王德榜續獲汪海洋妻張氏養子汪長林及僞列王
李海清僞天將栗時之僞神將劉文昌僞朝將尹炳朝

龍天義劉大福安天義譚有年魯天義謝引富喜天義
陳大有合天義蔣明富保天福楊世求及賊目張開元
馬東海唐有元宋興貴魏亞底周助坤萬金勝曹正保
等三百餘粵軍副將鄭紹忠搜獲僞贊王賴阿養僞朝
將劉必勝等並悍賊一百九十六鄧在倫李元順等亦
獲王友才江德勝王亞凱等十數賊皆伏誅惟僞奉王
黃十四卽黃明厚以先納款輸賊情免死其老弱及被
脅日淺者遞遣回籍婦女幼孩雇海船解送閩浙各籍
紳商畱養轉覓親屬領歸仍選其精壯分隸各軍暫給
口糧以待分起遣散而賊酋汪麻子斃於黃砂嶂譚體

元續爲黃少春所獲磔死計其斃賊一萬六七千生禽數千墜崖死者無算解散難民萬餘受降五萬餘僞帥凶渠無一漏逸附賊之土匪從賊之叛卒亦皆撲滅靡遺左公所謂逋誅劇寇自入網羅被脅窮黎長登衽席十餘年醜孽一鼓盪平非始願所及從此山陬海澨益震

天威而東南各省亦可脫甲解嚴與民休息矣左公於五年正月二十四日班師回閩前此嘗固辭一等伯封及席寶田軍獲洪福瑱於石城始拜

命後錫號恪靖至是捷疏入得

平浙紀略

卷十二
庚

旨賞戴雙眼花翎劉典鮑超高連陞黃少春王德榜康國器劉清亮以下獎賚有差追賊陣亡之千總顧惟奇李賢並優卹自古黃巾赤眉眾並百萬然皆蹂躪關輔流轉中原構患未成殄滅亦易從未有阻兵十七年流毒十六省亂久禍深如粵賊者賊起於粵亦滅於粵諸帥咸著削平之績左公兼收盪定之功越境討賊指揮若定大軍雲集旣和且勇雖以嗜嗔夙將猶秉節度用能釋


南顧之憂勞拯民生於水火勳懋史牒業震寰區有以也夫江皖閩粵皆平浙之餘烈事有始卒所宜附著而困獸鋌險死綏者眾軍行煙瘴物故者多橫草裹革同爲國

殤亦足見節制之有素而成功之不易焉

平浙紀略

卷十二

七



平浙紀略卷十二



